

Broj 114 - 115 * Godina XIII
Mart/ožujak - april/travanj 2012. godine



PRIVREDNA/GOSPODARSKA
KOMORA FEDERACIJE
BOSNE I HERCEGOVINE

GLASNIK

ISSN 1840-0310



Treća sjednica Skupštine P/GKFBiH

Unapređenje saradnje komorskog sistema

BiH - Republika Hrvatska

Ključno je brzo donošenje političkih odluka

ISSN 1840-0310



9 771840 031004

Nužna je reforma poreznog sistema

Na konferenciji za medije, održanoj početkom aprila u Mostaru, dopredsjednik Jago Lasić je kazao da ukoliko BiH ne želi da se suoči s grčkim scenarijem ili novim zaduženjima kod MMF-a do 2015. godine mora imati pokrivenost uvoza izvozom 85 posto

Prema njegovim riječima, za spas ekonomije BiH potrebno je izvršiti reformu poreznog sistema, uvesti dvojni stopu PDV-a, te neto plaće rasteretiti od svih davanja osim prema MIO/PIO-u i porezu na plaće.

- Nužna je i porezna reforma u BiH. Jedan od najboljih materijala porezne reforme s kojim se slaže i preko 95 posto gospodarstvenika napravio je Federalni zavod za programiranje razvoja u suradnji s drugih relevantnim institucijama.

Potrebno je rasteretiti rad, odnosno da opterećenja na neto plaću iznose 44,23 posto, umjesto sadašnjih 73,73 posto, čime bi se privukle strane investicije i kapital, te povećala zaposlenost.

Sva opterećenja na plaću idu u cijenu proizvoda zbog čega mi predlažemo reformu čitavog poreznog sistema u BiH - kazao je Lasić.

Kada je riječ o povećanju stope PDV-a, Lasić smatra kako će morati doći do promjene PDV-a, uvođenjem dvojne stope.

- Naš je prijedlog bio da se uvede dvojni stopa PDV-a, i to da svi inputi u poljoprivredi iznose pet posto, te da

se ta stopa primjenjuje i na osnovne živežne namirnice, lijekove, ortopedsku pomagala i slične proizvode. Ostalo da bude obuhvaćeno većom stopom - rekao je Lasić.

Govoreći o promjenama koje će nastupiti u ekonomiji BiH nakon ulaska Hrvatske u EU, kazao je da ne očekuje da će se tada dogoditi veliki poremećaji u bh. ekonomiji.

- Najveći poremećaji se očekuju u proizvodnji mlijeka, za šta nisu krivi proizvođači čiji pogoni (po mišljenju Evropske komisije) u 95 posto slučajeva zadovoljavaju evropske kriterije, već su krivi političari koji sporo donose odluke.

Nakon ulaska Hrvatske u EU, postrožiti će se izvoz naše robe u tu zemlju, posebno robe biljnog i životinjskog porijekla. Zato je BiH zatražila da se pravila Evropske unije ne primjenjuju na promet između BiH i Hrvatske od 1.

maja 2013. godine, već od 1. jula (u tom roku trebala bi se završiti evropska akreditacija naše BATA-e).

Što se tiče zabrane uvoza pojedinih proizvoda u BiH, Lasić je kazao kako u svim ugovorima postoji odredba kada se mogu uvesti privremene mjere, koje se uvode kada dođe do značajnih poremećaja na domaćem tržištu.

- Mi zadovoljavamo sve uvjete da možemo uvesti privremene mjere i već se pet godina borimo da se prije sezone uvede zabrana za proizvode koje u BiH možemo proizvesti i kvalitativno i količinski dovoljno za zadovoljavanje svojih potreba - naglasio je Lasić.



GLASNIK

Privredna / Gospodarska komora
Federacije Bosne i Hercegovine
List izlazi mjesečno
Godina XIII
Broj 114 - 115
Mart/ožujak - april/travanj 2012.

GLASNIK uređuje
Redakcijski kolegij:
Željana Bevanda,
glavni urednik,
Amela Kečo,
odgovorni urednik,
članovi:
Mira Idrizović,
Šemsa Alimanović,
Ljubo Dadić

i Meliha Velić,
sekretar Redakcije.

Adresa:

Privredna / Gospodarska
komora FBiH
- za Glasnik -
71000 Sarajevo

Branislava Đurđeva 10/IV
Kontakt osoba: Meliha Velić
Telefon: 033/566-300
E-mail: m.velic@kfbih.com

Telefoni:

033/566-222 (centrala)
033/217-782
Faks: 033/217-783
www.kfbih.com

Izdavač:

"Privredna štampa" d.o.o.
Sarajevo



Općinski sud Sarajevo
UF/1-2219/05,
RB 1-3018

Identifikacioni broj
4200088140005
Identifikacioni broj PDV
200088140005

DTP: "Privredna štampa"
Štampa: Suton d.o.o.
Varaždinska 2, Široki Brijeg
Besplatan primjerak

Unapređenje saradnje komorskog sistema



Na godišnjoj redovnoj sjednici Skupštine P/GKFBiH, održanoj 12. aprila, razmatrana su i usvojena dokumenta o poslovanju u prethodnoj godini, izvještaj o radu i finansijska dokumenta, te program aktivnosti za ovu godinu sa finansijskim planom

Prema riječima Avde Rape, predsjednika P/GKFBiH, potrebno je da se komorski sistem kvalitetnije uveže, kako bi bio brži i efikasniji u pružanju usluga svojim članicama.

Izvještaj o radu Komore u prošloj godini i kratku ocjenu privrednog ambijenta u FBiH dao je Jago Lasić, potpredsjednik P/GKFBiH.

- Posmatrajući gospodarstvo FBiH tokom prva dva mjeseca ove godine, industrijska proizvodnja je pala za 9,4 posto u odnosu na isti period prošle godine. Bilježi se i pad zaposlenosti. U odnosu na deseti mjesec lani je oko 2.500 manje zaposlenih u gospodarstvu. Smanjenje zaposlenosti gospodarstvenicima povećava opterećenja. U odnosu na isti period prošle godine izvoz FBiH je niži za 9,6 posto, dok je uvoz veći za 4,3 posto. Potrebno je poduzeti mjere na povećanju izvoza i smanjenju uvoza - kazao je Lasić.

O značaju unapređenja međukomorske saradnje govorio je Bruno Bojić, predsjednik Vannjotrgovinske komore BiH. Istakao je aktivan rad Međukomorskog vijeća.

- U toku je priprema novog pravilnika o međukomorskoj saradnji. Njime se predviđa usaglašavanje godišnjih programa i operativnih programa rada kako bi se izbjeglo nepotrebno preklapanje i dupliranje aktivnosti. Po završetku nacrt, pravilnik će biti dostavljen komorama na usaglašavanje, eventualne ispravke i potpisivanje - riječi su predsjednika Bojića.

Podršku djelotvornijoj saradnji dao je i Mladen Pandurević, direktor Udruženja poslodavaca FBiH.

- Komorski sustav je neophodan bh. gospodarstvu. Zajednički možemo polučiti bolje rezultate, s obzirom na to da vlast nije voljna da se kvalitetnije pozabavi problemima našeg članstva - riječi su Mladena Pandurevića.

Neki od prijedloga i preporuka članova Skupštine koji bi se trebali uvrstiti u program rada Komore za ovu godinu su da se Upravni odbor Komore češće sastaje, da se Vladi FBiH predloži ponovno aktiviranje obuke članova uprava i nadzornih odbora privrednih društava, te da se kroz materijal Federalnog zavoda za programiranje razvoja vlast pozove na poresku reformu.

S. Dž.

Ključno je brzo donošenje političkih odluka

U Privrednoj/Gospodarskoj komori FBiH u Mostaru, krajem ožujka, održan je radni sastanak o temi: „Promjene u vanjskotrgovinskim odnosima BiH i R Hrvatske u poljoprivredno-prehrambenom sektoru nakon pristupanja R Hrvatske EU”

Skupom su predvodili Jago Lasić, potpredsjednik P/GKFBiH, i Nadan Vidošević, predsjednik Hrvatske gospodarske komore (HGK). Osim predsjednika HGK, sastanku je nazočila i Božica Marković, direktor sektora poljoprivredno-prehrambenog sektora, mr. Tatjana Tomić, predstojnica Ureda za trgovinsku politiku, dr. Mirjana Mataušić Pišl, predstojnica Uprave za veterinarstvo, veleposlanik Tonči Staničić, te direktori i članovi Uprave Agrokora, Atlantic grupe, Dukata, Gavrilovića, Granolia, Kraša, MI braća Pivac, Podravke, TDR-a, Vindije i Koke. Od bh. institucija sastanku su bili nazočni Darko Čobanov iz Ured za veterinarstvo BiH, Dalibor Vidačak iz Agencije za sigurnost hrane BiH, te Ivica Cvjetković, pomoćnik federalnog ministra trgovine.



Što se tiče gospodarstva FBiH, bili su nazočni predstavnici grupacija poljoprivredno-prehrambene industrije iz oblasti mljekarstva, proizvodnje i prerade mesa, ribe, voća i povrća, meda, piva, bezalkoholnih pića, vina, suhog voća i povrća, smrznutih proizvoda, mlinско-pekarske i konditorske industrije.

Kvalitetno rješenje

- Svoje trgovinske odnose BiH i Hrvatska najprije su regulirale bilateralnim ugovorom iz 2000. godine (Ugovor o slobodnoj trgovini). Tadašnja politika BiH bila je da će liberalizacijom dovesti konkurenciju domaćim tvrtkama, sa jedne, i proširiti svoje tržište, sa druge strane.

Svjesna toga da je proizvodnja, odnosno količina jedina koja je konkurentna i profitabilna BiH se odlučila za liberalizaciju. Prvi ugovor o slobodnoj trgovini potpisan je sa Hrvatskom. Tokom 2006. godine zamijenjen je CEFTA ugovorom koji je obuhvatio trgovinu u jugoistočnoj Europi. I danas radimo po CEFTA pravilima iz ugovora sa R Hrvatskom i sa zemljama jugoistočne Europe. Hrvatska će sljedeće godine, ako bude sve išlo po redu, 01. 07. 2013. postati 28. članica Europske unije. Granica između BiH i Hrvatske biti

će vanjska granica Europske unije i potpuno se mijenja režim međusobne trgovine između BiH i Hrvatske - kazao je potpredsjednik Lasić.

Prema njegovim riječima, za trgovinu unutar CEFTA, koja je specifična za BiH, radi se negdje oko 35%, od tih 35% vanjskotrgovinskog prometa, 95% odnosi se na Hrvatsku, Srbiju i Crnu Goru. To znači na zemlje iz našeg okruženja.

- Iznimno nam je stalo da otklonimo pr-

obleme koji mogu izbit ulaskom Hrvatske u Europsku uniju. Za to imamo vremena i to je bio razlog za sazivanje ovog sastanka gdje se mogu identificirati problemi i iznaći što kvalitetnije rješenje za BiH ako hoće izvoziti u Europsku uniju. Iskustva koje ima Hrvatska na tom polju nam mogu pomoći da pripremljeni dočekamo njen ulazak u Europsku uniju - istakao je Lasić.

Ukazao je na ukupnu vanjsku trgovinu između dvije zemlje.

- U zadnjih pet godina u R Hrvatsku izvezli smo 5.607.000.000 KM. U isto vrijeme uvezli smo 13.940.000.000 KM, prosječna pokrivenost je 40,22%. Od ukupnog izvoza BiH u zadnjih pet godina je 16,35% završavalo na području Hrvatske, dok smo u isto vrijeme iz Hrvatske uvezli 19,79%.

Najznačajniji sektor u uvozu u BiH iz Hrvatske je agroindustrijski, od uvoza iz Hrvatske u BiH 29% se odnosi na ovaj sektor. Posebno osjetljive djelatnosti i skupine proizvoda koje mogu doći u nepriliku povodom ulaska Hrvatske u Europsku uniju su žive životinje, meso i drugi klaonički proizvodi, ribe, ljuskari,



mekušci, mlijeko i mliječni proizvodi, prerađevine od mesa i riba. Problemi sa kojima se BiH već sada susreće, koje treba otkloniti, jesu akreditacije, te granični prijelazi - precizirao je Lasić.

Jedinstveni ekonomski prostor

Predsjednik Vidošević je govorio o trnovitom putu Hrvatske prema Europskoj uniji, te napomenuo da maksimalno stoje na raspolaganju svim bh. institucijama.

Smatra da je interes i jedne i druge strane da jedinstveni ekonomski prostor koji imamo ne smijemo razbijati zbog naše neefikasnosti.

Ključno je brzo donošenje političkih odluka, zato što iza toga stoji mukotrpan tehnički posao. - Ako nemate političku odluku, onda tehnički posao ne možete početi provoditi - kazao je Vidošević.

Prema informacijama koje ima, smatra da je dobro što je u BiH gospodarstvo na visokom stupnju spremnosti, na razini poduzeća, što je bitno i, drugo, da postoji kadar.

- Dakle, nije problem nedostatka kadra da bi se mogao uspostaviti sustav. O tome mora postojati minimum političkog dogovora - zaključio je Vidošević.

U raspravi su sudjelovali svi predstavnici hrvatskih i bh. institucija, kao i brojni gospodarstvenici. Zaključeno je da ne treba stvarati politički problem oko uvoza i izvoza između BiH i Hrvatske. Sve prepreke kada je riječ o BiH, koje će se pojavljivati kroz granične prijelaze, veterinarsku zaštitu, te akreditaciju u BiH, što će otežavati robnu razmjenu, pogotovo proizvoda animalnog podrijetla, neće biti više odgovornost Hrvatske.

Erina LASIĆ, dipl. inž.
lasicerina@yahoo.com

Susreti

Predstavnici Svjetske banke posjetili Komoru

Predstavnici Svjetske banke Gabriela E. Azuela, viši stručnjak za energiju, i Paulo G. Correa, vodeći ekonomist, krajem marta, posjetili su BiH. U okviru te posjete sastali su se sa predstavnicima P/GKFBiH.

Razgovaralo se o izradi Regionalne strategije o istraživanju i razvoju u polju inovacija za zapadni Balkan, uz osvrt na obnovljive izvore energije, prikupljanje i uskladištenje ugljika i energetske efikasnosti, o novim tehnologijama i inovacijama.

Gosti iz Svjetske banke prisustvovali su regionalnoj radionici, posvećenoj pomenutoj strategiji koja je održana u Sarajevu.

Š. A. i L. S.

Dupli troškovi za poljoprivrednike

Održan je 26. ožujka u Mostaru u organizaciji P/GKFBiH, Privredne komore Srbije i regionalnih privrednih komora Kraljevo, Užice i Valjevo. Nazočili su gospodarstvenici iz Federacije BiH i Republike Srbije

Susrete je otvorio Jago Lasić, potpredsjednik P/GKFBiH.

- Ovakvi susreti gospodarstvenika koje organiziraju gospodarske komore potiču međusobno spajanje ili povezivanje s ciljem izrade zajedničkog proizvoda više tvrtki iz jedne ili obe regije. Srbija spada među najveće vanjskotrgovinske partnere BiH. Sudjelovanje Srbije u ukupnoj robnoj razmjeni u BiH u prošloj godini je u padu u odnosu na 2009. godinu, kao i ukupna razmjena sa EU. Osnovni razlog jeste u tome što se pojavljuju novi dobavljači iz trećih zemalja (SAD, Kina, Rusija) - riječi su Jage Lasića.

U ime regionalnih privrednih komora Srbije govorio je Mladimir Novaković, predsjednik Regionalne privredne komore Kraljevo. Prema njegovim riječima, BiH se nalazi u prvih pet zemalja u robnoj razmjeni sa Srbijom.

- Treba iskoristiti sve prednosti koje ove dvije regije imaju. To je određena komplementarnost u proizvodima u čemu su velike mogućnosti za dalju saradnju - kazao je predsjednik Novaković.

U ime Privredne komore Srbije podatke o robnoj razmjeni je iznio Mitar Pržulj.

- Ukupna robna razmjena između Srbije i BiH u 2011. godini iznosila je 1.906.000.000 USD, s tim da Srbija nije dostigla ukupnu razmjenu s BiH iz 2008. godine, dok je BiH premašila 2008., jer brže raste izvoz iz BiH nego uvoz iz Srbije. Po strukturi proizvoda Srbija u BiH izvozi najviše pivo, kukuruz, električnu energiju i pšenicu, BiH u Srbiju najviše izvozi koks, ugljen, dizel-gorivo i proizvode od čelika. Robnom razmjenom ne možemo biti zadovoljni, jer se u 90% slučajeva radi o klasičnim kupoprodajnim ugovorima. Cilj je unaprijediti suradnju. Jedan od primjera jeste suradnja između industrije motora Rakovica iz Beograda i Soko transmisije iz Mostara. Njihovo je potencijalno tržište afričko, za koje je već ugovorena proizvodnja 15.000 traktora. Postoji mogućnost suradnje u energetici, u slivu rijeke Drine, o kojoj već postoji potpisan protokol, kao i suradnja u metalo-prerađivačkom

sektoru. Ukupna ulaganja Srbije u BiH, odnosno Republiku Srpsku iznose milijardu eura, od čega ja najveća kupovina Telekomu Republike Srpske. Ulaganja BiH u Srbiju iznose oko 100.000.000 USD. Najveće ulaganje je kupovina građevinskog poduzeća Komgrad u Beogradu. Srbija i BiH imaju najviše problema u prometu poljoprivrednih proizvoda, odnosno nepriznavanju, s jedne, i veterinarskih i fitosanitarnih uvjerenja, s druge strane, što poljoprivrednicima stvara duple troškove - kazao je Pržulj.

Željana BEVANDA

zeljana_bevanda@yahoo.com

Projekti

Potpisan Memorandum za povoljno poslovno okruženje

U Beogradu su predstavnici Srbije, Republike Srpske, Federacije BiH, Hrvatske i Makedonije potpisali memorandum o razumijevanju u vezi sa projektom "Certifikacija povoljnog poslovnog okruženja - Međunarodni pečat kvaliteta za opštine sa povoljnim okruženjem za investitore".

Cilj projekta jeste jačanje ekonomske saradnje i promocija investicija u Srbiji, BiH, Hrvatskoj i Makedoniji. Također, cilj projekta je i uspostavljanje jedinstvenih standarda kvaliteta i sistema certifikacije u uslugama opština i gradova potencijalnim investitorima, prije svega privrednicima koji posluju na lokalnom nivou, kojim bi bila obezbijedena međunarodna prepoznatljivost i jačanje jugoistočne Evrope.

Projekat traje 18 mjeseci, nakon čega bi opštine koje ispune predviđene standarde dobile regionalni certifikat kojim se potvrđuje da imaju povoljno poslovno okruženje.

Finansijsku podršku za projekat je obezbijedilo Njemačko društvo za međunarodnu saradnju - GIZ i Otvoreni regionalni fond za jugoistočnu Evropu - ORF.

M. I.



Privredna komora FBiH na sajmu ekologije

Drugi po redu sajam ekologije „ECO EXPO 2012“ održan je 1. i 2. marta ove godine u Beogradu, na kojem se okupilo više od 100 preduzeća iz Srbije i zemalja regiona

Cilj ovogodišnjeg sajma bio je da se kompanije povežu sa odabranim partnerima i institucijama i pokrenu nove projekte koji će imati veliki značaj za životnu sredinu. Pored izložbene postavke, na ovogodišnjem sajmu su organizovane i stručne konferencije, kao i poslovni sastanci između učesnika.

Organizator sajma je nevladina organizacija Zelena Eko planeta, dok je partner Privredna komora Srbije.

Prisustvovala su sve značajnije institucije iz oblasti zaštite životne sredine iz Republike Srbije, privredne komore iz zemalja regiona, kao i privatni sektor iz tzv. zelene ekonomije.

U delegaciji iz Bosne i Hercegovine na ovogodišnjem sajmu su bili Bruno Bojić, predsjednik Vanjskotrgovinske/Spoljno-trgovinske komore BiH, Avdo Rapa, predsjednik Privredne/Gospodarske komore Federacije BiH, Mladen Rudež, pomoćnik ministra u FMOIT, Živorad Kovačević, v.d. direktor Centra za kvalitet V/STKBiH, Stanko Ivaštanin, predstavnik Privredne komore Republike Srpske, te predstavnici konsultantske kuće CETEOR Sarajevo.

Predsjednik P/GKFBiH je imao konstruktivno i zapaženo obraćanje. U uvodnom obraćanju na glavnom skupu Rapa je, između ostalog, istakao:

- „ECO EXPO 2012“ predstavlja izvrsnu priliku, kao što je i u pozivu napisano, za promovisanje proizvoda i usluga, poslovnih prilika i

novih tehnologija iz oblasti zaštite životne sredine, obnovljivih izvora energije i energetske efikasnosti. U okviru manifestacije „ECO EXPO 2012“ značajno je za nas predstavljanje:

- berze regionalnih projekata (prezentacije kompanija),
- mogućnost zajedničke realizacije regionalnih projekata (investicioni forum),



- najznačajniji regionalni projekti iz oblasti zaštite životne sredine.

Smatramo da manifestacija „ECO EXPO 2012“ može nositi naziv Prvi balkanski samit ekologije, jer će biti, kako to i obećavaju organizatori, fokusiran na regionalnu saradnju u obuhvaćenim oblastima.

Pomoćnik ministra okoliša i turizma Mladen Rudež je učestvovao na pratećoj konferenciji o zaštiti okoliša, obnovljivim izvorima energije i energetske učinkovitosti sa prezentacijom „Iskustva iz FBiH /BiH u oblasti izdavanja okolišne dozvole“.

Prošlogodišnji ECO EXPO prerastao je formu sajma, pa je ovogodišnje, balkansko, izdanje bila platforma za promociju i razmjenu profesionalnih iskustava i znanja iz različitih područja zaštite životne sredine: voda, vazduh, zemlja.

A. K.

Predstavnicima Komore u Bosansko-podrinjskom kantonu

Predsjednik Privredne/Gospodarske komore FBiH Avdo Rapa i Hamdo Katica, predsjednik Skupštine P/GKFBiH, krajem februara su posjetili Vladu Bosansko-podrinjskog kantona



Domaćini predstavnicima Komore bili su Emir Frašto, premijer Vlade BPK, i Dževad Terović, v.d. predsjednik Privredne komore BPK.

Razlog ove posjete jeste iznalaženje načina i sagledavanje mogućnosti kako pomoći privredi BPK Goražde u daljem razvoju. Akcenat je stavljen na implementiranje onih zakona koji mogu potaknuti veće zapošljavanje i brži razvoj ovog područja.

Između ostalog, razgovarano je i o budućim planovima BH Telecom-a na ovom prostoru. Prema riječima Hamde Katicice, izvršnog direktora Direkcije za razvoj poslovanja u Upravi BH Telecoma, jedna od važnih stvari o kojoj je bilo riječi jeste i izgradnja kontakta centra u Goraždu.

Prema riječima v.d. predsjednika Terovića, dio pitanja koja su obuhvaćena ovim razgovorom je predviđen i Programom rada Komore, a odnose se na intenziviranje razgovora i aktivnosti sa javnim preduzećima koji imaju svoje filijale, odnosno poslovnice u Goraždu, koji ovom kraju mogu pružiti više podrške u segmentima koji su važni.

Od društveno odgovornih kompanija, kao što je BH Telecom, očekujemo da daju veći doprinos u razvoju sporta i kulture, a, evo, vidjeli smo da možemo očekivati i nove investicije i nova zapošljavanja - istakao je Terović.

Amela KEČO, dipl. pravnik
a.keco@kfbih.com

Ekonomski forum u Istanbulu

U BiH spremno investirati 26 turskih kompanija

Na Evroazijskom ekonomskom forumu u Istanbulu, na kome je delegacija BiH predstavila razvojne projekte, spremnost za investiranje izrazili su predstavnici 26 turskih kompanija, prenosi eKapija.

Članovi delegacije BiH, koju je predvodio Damir Hadžić, ministar transporta i komunikacija BiH,

održali su i brojne sastanke sa predstavnicima turskih kompanija zainteresovanih za ulaganje u kožarsku industriju, energiju, transport, građevinarstvo, zdravstvo, turizam i obrazovnih ustanova koji žele da otvore univerzitetske podružnice u BiH.

Hadžić je učestvovao u radu okruglog stola svih ministara transporta prisutnih na samitu, u organizaciji resornog ministarstva Azerbejdžana, saopšteno je iz Savjeta ministara BiH.

U delegaciji BiH bili su Nermin Nikšić, premijer Federacije BiH, federalni ministri finansija Ante Krajina, energije, industrije i rudarstva Erdal Trhulj i obrazovanja i nauke Damir Mašić.

Potpisano sedam sporazuma o suradnji

Vanjskotrgovinska komora BiH bila je domaćin susreta predstavnika privrednih komora sa članovima Vijeća i podvijeća za promociju međunarodne trgovine Narodne Republike Kine

Prisustvovali su i predstavnici šest gospodarski najrazvijenih provincija NR Kine, te Privredne/Gospodarske komore Federacije Bosne i Hercegovine, Privredne komore Zeničko-dobojskog kantona, Gospodarske komore Hercegovačko-neretvanske županije, Privredne komore Unsko-sanskog kantona, Privredne komore Srednjobosanskog kantona i Privredne komore Brčko Distrikta BiH.

Mogućnosti ulaganja

Prema riječima Brune Bojića, predsjednika VTKBiH, ovim susretima prethodile su ranije dvije posjete Vijeća NR Kine Komori. Prošle godine održan je Poslovni forum privrednika BiH i Kine kojima je prisustvovalo oko 100 kineskih i oko 200 bh. privrednika iz oko 150 kompanija. Nakon održanih susreta i iskazanog interesa, a na inicijativu predstavnika Vijeća za promociju međunarodne trgovine NR Kine, početkom marta, u Komori je upriličena promocija Kanton sajma. Ova treća posjeta, kako je naglasio predsjednik Bojić, ima cilj da se uspostave čvršće institucionalne veze komorskog sistema BiH i Vijeća i podvijeća za međunarodnu trgovinu NR Kine kako bi se ojačala suradnja na polju investicija kroz konkretne razgovore.

Predsjednik je upoznao prisutne sa organizacijom komorskog sistema u BiH i informirao o gospodarskim mogućnostima. Istakao je pogodnosti koje stoje na raspolaganju potencijalnim investitorima, te naveo sektore koji mogu biti od interesa za ulaganja.

Mala i srednja poduzeća

Potpredsjednik Vijeća Yu Ping je naglasio važnost suradnje između Vanjskotrgovinske komore BiH i Vijeća i istakao potrebu da se ona proširi na lokalne komore kako bi se bila učinkovitija. Naglasio je da u zajedničkoj suradnji pred-

nost treba dati malim i srednjim poduzećima kojima treba podrška institucija i komora.

Prema njegovim riječima, posjeta kineske delegacije, koju čine i predstavnici šest privredno najrazvijenih provincija NR Kine, usmjerena je na sagledavanje mogućnosti investiranja kroz razmjenu međusobnih informacija i pružanja svake vrste pomoći zainteresiranim kompanijama.

Potpisani su sporazumi o suradnji između predstavnika podvijeća i kantonalnih komora, u skladu sa zastupljenim privredama. Potpisani su između Podvijeća Guangdong sa Privrednom komorom Federacije Bosne i Hercegovine i Privrednom komorom Zeničko-dobojskog kantona, Podvijeća Fujian sa Privrednom komorom Tuzlanskog kantona i Privrednom komorom Brčko Distrikta BiH, te Podvijeća Hainan sa Gospodarskom komorom Hercegovačko-neretvanske županije, Privrednom komorom Srednjobosanskog kantona i Privrednom komorom Unsko-sanskog kantona.

www.komorabih.ba

Sajam „AGRA 2012“

Očekuje se učešće bh. izlagača

Privrednu/Gospodarsku komoru FBiH, krajem marta, posjetili su predstavnici Pomurskog sajma „AGRA 2012“ iz Gornje Radgone, Slovenija. Osim predstavnika sajma u delegaciji je bio i Gregor Preskar, ministar savjetnik Ambasade Republike Slovenije u BiH.

Ovogodišnji Pomurski sajam se održava od 25. do 30. avgusta. Sajam poljoprivrede i prehrambenih proizvoda slavi 50-tu godišnjicu svog postojanja.

U godini jubileja okupit će predstavnike resornih ministarstava, komora, udruženja, fakulteta, proizvođače, zemalja iz regije i Evropske unije, kako bi razmijenili iskustva i predstavili pravce razvoja za budući period. Gosti su kazali da žele da se na sajmu predstavite i proizvođači iz BiH.

Š. A.

Stimulirati proizvođače električne energije i zaštititi građane

S obzirom na to da važeća Uredba o korištenju obnovljivih izvora energije (OIE) i efikasne kogeneracije objavljena u „Službenim novinama Federacije BiH”, br. 36/10, 11/11 i 88/11, kao podzakonski akt, nije u dovoljnoj mjeri uređila problematiku korištenja OIE, ukazala se potreba za donošenjem zakona kojim bi se otklonili uočeni nedostaci, a ova problematika jasnije definirala

Nakon što je Federalno ministarstvo energije, rudarstva i industrije (FMERI), uz podršku stranih konsultanata, pokrenulo aktivnosti na njegovoj izradi, Nacrt zakona o korištenju OIE i efikasne kogeneracije prošle godine je upućen u parlamentarnu proceduru. Predstavnički dom Parlamenta Federacije BiH, na sjednici održanoj u novembru 2011. godine, prilikom razmatranja Nacrta zakona, usvojio je zaključak kojim je utvrđeno da predmetni Nacrt može poslužiti kao osnova za izradu Prijedloga zakona, te je predlagač zadužen da organizira i provede javnu raspravu.

Toplotna energija

Javna rasprava na kojoj su privrednici i stručnjaci diskutovali o tekstu Nacrta zakona o korištenju OIE i efikasne kogeneracije održana je u Privrednoj/Gospodarskoj komori Federacije BiH.

U ime predlagača zakona, FMERI, Tarik Begić, šef Odsjeka za elektroenergetiku, istaknuo je njegov značaj, te da se ova oblast treba urediti na kvalitetan način. Napomenuo je da važeća Uredba nije dovoljno obradila spomenuta pitanja.

Prema njegovim riječima, cilj je pokušati sprovesti obaveze koje je BiH preuzela kroz razne međunarodne ugovore, kao i da se EU direktive koje reguliraju tu oblast implementiraju u domaće zakonodavstvo. Kvalitetne primjedbe i sugestije s javnih rasprava bit će korištene prilikom izrade Prijedloga zakona o korištenju OIE i efikasne kogeneracije. Pravi kvalitet

zakon će dobiti donošenjem podzakonskih akata, metodologija i odluka koje proističu direktno iz zakona.

I predsjednik Odbora za energetiku, rudarstvo i industriju Federalnog parlamenta Slaviša Šućur smatra da je predloženi tekst dobra osnova za donošenje tog zakona. Dobro je i što će stimulirati građane da počnu sami generirati energiju malim vjetrenjačama ili solarnim kolektorima. Skrenuo je pažnju na to da se tekst Nacrta zakona bavi električnom energijom, ali da bi se trebao posvetiti i toplotnoj energiji za šta BiH ima velike mogućnosti.

Uz dobru posjećenost javnoj raspravi, privrednici su pozdravili zakon slažući se da postoje određene primjedbe na tekst. Predložena su rješenja kako bi se provođenjem zakona u ovoj oblasti mogli napraviti očekivani pomaci bez administrativnih prepreka i nedorečenosti, što je samo potvrdilo koliko je zakon važan za buduće regulisanje ove oblasti. Privrednici i predstavnici struke upozorili su na moguće „zamke” kod poticajnih mjera za investitore, kao i na funkcije budućeg operatora za čije je uvođenje bilo mišljenja i za i protiv.

U ovaj sektor dosad je uloženo više od 20 miliona KM stranih i privatnih sredstava i osnovano preko 20 malih firmi koje rade na projektovanju i izgradnji malih hidroelektrana i pripremi vjetro i solarnih. Od ukupnog broja malih hidroelektrana, trećina je napravljena s 95 posto opreme iz BiH.

Kreiranje uvjeta za investitore

Naša zemlja ima dobar potencijal obnovljivih izvora - hidroenergije, biomase, vjetra i solarne energije. Da bi se privukao strani ili angažirao domaći kapital, moraju se kreirati povoljni uvjeti za poslovanje, odnosno povoljna investiciona klima za strane i domaće ulagače. Stoga u ekonomskom smislu naša zemlja treba tražiti rješenja koja će udovoljiti investitorima koji su u zapadnim zemljama stimulirani po tzv. garantnim cijenama. Naglašeno je da ovaj zakon treba omogućiti da se uspostavi ravnoteža između poticaja i standarda građana koji na

neki način sudjeluju u prikupljanju sredstava potrebnih za te poticaje. Zakon bi trebao utvrditi i dinamičke kvote po određenim tehnologijama, te odrediti šta će tačno biti poticano i šta će biti stavljeno na tržište.

Primjedbe i sugestije s javne rasprave dostavljene su pismeno nadležnom ministarstvu. Očekuje se da će se na osnovu toga doći do teksta zakona koji bi trebao da zaštiti interese građana i kreirati povoljno okruženje za sve koji se žele baviti proizvodnjom energije iz obnovljivih

izvora energije, što je, na globalnom nivou, prepoznato ne samo kao dobar biznis nego i kao jedan od važnih alata u borbi protiv klimatskih promjena.

Osim Sarajeva, javna rasprava o Nacrtu zakona o korištenju obnovljivih izvora energije i efikasne kogeneracije održana je i u Tuzli i Mostaru.

Lejla SADIKOVIĆ
l.sadikovic@kfbih.com

Kalesija

Prva solarna elektrana u regionu

Federalni premijer Nermin Nikšić u Kalesiji je, krajem marta, pustio u pogon solarnu elektranu u preduzeću „Eko energija”d.o.o. Riječ je o prvoj solarnoj elektrani u regionu. Nalazi se u sastavu sportske dvorane koja je u izgradnji.

„Eko energija” iz Kalesije, u vlasništvu Selmira i Sadika Fatića, u projekt izgradnje elektrane investirala je 800.000 KM.

„Ovo je veliki dan, ne samo za Kalesiju, Tuzlanski kanton i Federaciju, ovo je veliki dan za region. Pogon ovakve vrste nemaju zemlje koje su u našem okruženju”, rekao je premijer Nikšić.

Prikuplja se sunčeva energija, koja se pomoću solarnih modula pretvara u električnu, a potom šalje u sistem Elektroprivrede Bosne i Hercegovine.

- Projektu izgradnje solarne elektrane smo hrabro pristupili i mislim da nismo pogriješili. Željeli smo u svom gradu izgraditi kapacitet naslonjen na modernu tehnologiju, koji će poboljšati životnu sredinu. Svjesni smo da je ovo pionirski poduhvat pun teškoća, koji je, isto tako, koristan za društvo - rekao je Sadik Fatić.

Reagovanja

Kriteriji za poticaje bez konsultacija struke

Povodom usvajanja „Kriterija za korištenje sredstava za podsticanje proizvodnje električne energije iz OIEiK u 2012. godini” Vlade FBiH, uslijedila je argumentirana pismena reakcija Sekcije obnovljivih izvora energije. Održan je i hitan sastanak udruženja Asocijacije proizvođača el. energije iz obnovljivih resursa (APEOR BiH).

Izražena je zabrinutost zbog načina donošenja ovakvih kriterija od nadležnog Ministarstva (FMERI), bez bilo kakvih stručnih podloga ili konsultacija sa stručnjacima i stručnim udruženjima. Takvi netransparentni postupci imaju negativne posljedice na razvoj sektora obnovljivih izvora, koji je ionako nejak i pod stalnim formalnim pritiskom. Prije svega, zbog nedostatka znanja i razumijevanja okruženja, dok u evropskim okvirima ovaj sektor predstavlja okosnicu strategija razvoja energetike.

Sva zakonska i podzakonska akta, odluke, vezane za obnovljive izvore energije gdje spadaju i doneseni „Kriteriji...” moraju biti bazirani na stručnim analizama i osigurati nesmetan, kontinuiran i nediskriminirajući razvoj sektora OIE, vodeći računa o prirodnim potencijalima. To dugoročno treba donijeti korist, a ne dodatna opterećenja stanovništvu.

APEOR i Sekcija OIE pri P/GKFBiH traže uvažavanje i partnerski odnos i punu saradnju u fazi pripreme i donošenja posebno podzakonskih akata, te konačno donošenje strategije razvoja OIE u FBiH. Očekuju da Vlada i nadležno ministarstvo radi općeg dobra uvažuje njihove prijedloge vezane za dalji rad, te primjedbe i sugestije vezane za aktuelni dokument „Kriteriji...”.

I dalje bez Zakona o šumama

Na sjednici Grupacije, održanoj početkom marta, razmatran je prijedlog mjera za unaprijeđenje stanja u industriji namještaja i analizirano stanje u proizvodnji drvne industrije i šumarstva

Iako je glavna aktivnost Grupacije tokom prošle godine bila usmjerena na primjenu Zakona o šumama, do njegovog usvajanja još uvijek nije došlo. Zbog nepostojanja ovog zakona način organizacije privrednih društava koja se bave eksploatacijom drveta predstavlja glavnu kočnicu razvoja drvoprerađivačke industrije.

- To je razlog zbog kojeg većina drvoprerađivača ima poteškoće u snabdijevanju sirovinom - kazao je Zdenko Laštro, predsjednik Grupacije.

Duge zakonske procedure

Maja 2002. godine Parlament FBiH usvojio je Zakon o šumama, koji je odlukom Ustavnog suda FBiH prestao važiti 2009. godine. Nakon čega je Vlada FBiH, kao prelazno rješenje, donijela Uredbu koja je bila na snazi do 06. decembra prošle godine. Od tada federalne vlasti nisu usvojile novi propis kojim bi se osiguralo pravo općina kao jedinica lokalne samouprave da budu uključene u odluke o iskorištavanju, čuvanju i obnavljanju šumskog fonda.

Grupa poslanika uradila je Nacrt zakona o šumama kojim je predviđeno da će o formiranju šumsko-privrednih društava i određivanju njihovih granica odlučivati Vlada FBiH na prijedlog općina. Saglasnost na to davat će federalna Uprava za šumarstvo. Glavni strateški planski dokument politike gazdovanja šumama i divljači donosit će FBiH. Nacrtom je propisana zabrana čiste sječe šuma, kao i uvjeti pod kojima će biti organiziran promet drveta.

Nacrt zakona o šumama razmatran je na sjednici Doma naroda Parlamenta FBiH (08. decembra 2011. godine). Izjašnjavanje je odgođeno dok se ne provedu zakonske procedure.

Vesla bez čamca

Midhat Ahmetović, dopredsjednik Grupacije, upozorava na to da je jedan od ciljeva u ovoj godini održati postojeću proizvodnju.

- Najveći problem jeste nepostojanje krovnog zakona koji uređuje oblast šumarstva i drvoprerade. Postoje vesla ali ne i čamac, zato nam je u postojećim uslovima teško raditi - riječi su dopredsjednika Ahmetovića.

Osim snabdijevanja sirovinom članovi Grupacije su izrazili svoje nezadovoljstvo komunikacijom i saradnjom sa resornim ministarstvima. Već duže vrijeme insistiraju na njihovom prijemu kod federalnog ministra poljoprivrede, vodoprivrede i šumarstva, te ministra energije, rudarstva i industrije. I pored toga, nije upriličen sastanak sa ministrima.

Usvojen je izvještaj o radu za prošlu i plan rada Grupacije za ovu godinu prema kojem su neki od prioriteta za poboljšanje stanja: donošenje zakona o šumama, usvajanje šumarskog programa, izrada strategije razvoja šumarstva i drvne industrije, certificiranje u šumarstvu, uvođenje FSCCoC certifikata kod prerađivača drveta i pomoć kod pronalaženja načina finansiranja. FSCCoC certificiranje (lanac uvezivanja) bit će obavezno 2012. godine.

Pad proizvodnje namještaja

Loše poslovno okruženje, nepostojanje zakonske regulative, izostanak pomoći države za pripremu proizvodnje za izvoz namještaja, velika finansijska opterećenja, skupa električna energija, problem sa nabavkom trupaca i njihovom cijenom, razlozi su zbog kojih je u proizvodnji namještaja i drugih finalnih proizvoda u FBiH u prošloj godini zabilježen pad u odnosu na 2010. godinu.

Indeks proizvodnje u preradi drveta je u blagom porastu u odnosu na godinu ranije, dok se bilježi pad u industriji namještaja.

- Očekujemo da će se pomoću određenih mjera koje je najavila Vlada i resorna ministarstva stanje na tom polju popraviti - kazao je predsjednik Laštro.

Prema podacima Federalnog zavoda za statistiku, ukupna proizvodnja šumskih sortimenata za 11 mjeseci prošle godine veća je za 108.000 m³ ili 6,2 posto.

Proizvodnja sortimenata od četinjača veća je za 73.000 m³ ili za devet posto, dok je proizvodnja od listača veća za 36.000 m³ ili četiri posto.

Ukupna prodaja šumskih sortimenata u pomenutom periodu veća je za 112.000 m³ ili 6,5 posto.

Prodaja sortimenata od četinjača veća je za 81.000 m³ ili za deset posto, dok je prodaja sortimenata od listača veća za 30.000 m³ ili za 3,3 posto.

Prema riječima dopredsjednika Ahmetovića, 71 kompanija u BiH posjeduje FSCCoC certifikat, od toga su 22 kompanije u FBiH.

Jedna od aktivnosti planiranih za ovu godinu jeste i praćenje isporuke celuloznog drveta maglajskom „Natron-Hayatu”, prema dogovoru sa resornim ministarstvom FBiH. Vezano za to nekoliko članova Grupacije se protivi tome da ova kompanija ima povlašteni položaj u odnosu na druge.

Selma DŽINIĆ



Tekstilno, kožarsko-prerađivačka industrija

U toku izrada Strategije razvoja

Cijeneći da je situacija u industriji tekstila odjeće, kože i obuće teška, Hrvoje Brajković, sekretar Sektora tekstilno, kožarsko-prerađivačke industrije P/GKFBiH, inicirao je izradu strategije za razvoj ovih industrija

Nakon što je P/GKFBiH izradila Strategiju industrije tekstila, odjeće, kože i obuće, Vladi FBiH je ponuđena izrada zajedničkog dokumenta.

S obzirom na to da je Vlada FBiH svojim akcionim planom od 2012. do 2015. godine predvidjela izradu Strategije za industriju tekstila, odjeće, kože i obuće, predstavnici Komore su se obratili Erdalu Trhulju, ministru Federalnog ministarstva energetike, rudarstva i industrije, sa prijedlogom da se pristupi zajedničkoj izradi Strategije.

Dobivši podršku ministra Trhulja, pristupilo se pripremnim aktivnostima.

Osim predstavnika Komore i pomenutog ministarstva u radnu grupu imenovani su i predstavnici kompanija iz tekstila, odjeće, kože i obuće.

Članovi radne grupe su se sastali već tri puta i dogovorili određene pravce djelovanja.

Strategija koju je napravio Sektor tekstilno, kožarsko-prerađivačke industrije P/GKFBiH poslužit će kao osnov za izradu zajedničke strategije Komore i Ministarstva.

H. B.

21. mart - Svjetski dan šuma

Ostajemo bez pluća Planete

Kantonalna privredna komora Tuzla i JP Šume TK d.d. Kladanj organizirale su svečanost povodom 21. marta, Svjetskog dana šuma.

Ovaj dan se već 40 godina obilježava kao podsjetnik na značaj šuma, apostrofirajući brojne koristi koje od njih imamo. Na 23. sjednici Generalne skupštine Evropske poljoprivredne konfederacije 1971. godine ustanovljen je 21. mart kao svjetski dan šuma. Kasnije, iste godine, organizacija UN za hranu i poljoprivredu (FAO) podržala je ideju, vjerujući da bi takav događaj doprinio povećanju svijesti o značaju šuma.

Izabran je 21. mart, kao dan jesenje ravnodnevice na južnoj, odnosno proljetne na sjevernoj hemisferi, kao dan proslave i obilježavanja tri ključna aspekta šumarstva: zaštite, proizvodnje i rekreacije.

Šume obezbjeđuju značajne funkcije za cijelo društvo, uključujući svježu vodu, siguran dom za floru i faunu, životnu sredinu za one koji uživaju u divljini, kao i arheološko i istorijsko nasljeđe.

Šumska zemljišta u Bosni i Hercegovini pokrivaju 53% površine države, ali se mi još pridržavamo stare uzrečice i „od drveća ne vidimo šumu“.

Dok šleperi prepuni najkvalitetnijeg drveta, poluproizvodi drvne industrije i palete sa najboljom bukovinom za italijanske pizzerie treskajući se lokalnim putevima idu ka granici, šume oko nas posmatramo samo kao izvor prihoda.

„Šume i šumska zemljišta u Bosni i Hercegovini rasprostiru se na površini od više od dva i po miliona hektara. Ta površina svakodnevno se smanjuje, mada je svaka prenamjena šume protivna međunarodnoj konvenciji, jer ostajemo bez pluća Planete“, saopćeno je iz Kantonalne privredne komore Tuzla.

U Federaciji BiH bez značajnih promjena

Kao i prethodnih godina, zaključno sa 31. januarom 2011. godine, Federalno ministarstvo trgovine je izradilo pregled uvoza naftnih derivata u Federaciju Bosnu i Hercegovinu za 2011. godinu

U skladu sa odredbama Općih i posebnih mjera za ostvarenje bilanca energetske potreba FBiH („Službene novine Federacije BiH”, broj 8/11), Federalno ministarstvo trgovine prati snabdijevanje tržišta naftnim derivatima po količinama, lokalitetu prodaje u tranzitu, skladištenju zalihama i veleprodajnom prostoru.

Bilansom naftnih derivata za 2011. godine planiran je uvoz naftnih derivata u količini od 650.000 tona, a 250.000 tona je planirano nabaviti iz proizvodnih kapaciteta rafinerije u Bosanskom Brodu. Realizirani uvoz n/d u 2011. godini iznosi 639.111 t n/d što je za oko 1,27% manje u odnosu na isti period godinu ranije, kada je realizovan uvoz od 647.336 tona n/d.

Najveći uvoz n/d zabilježen od 1. 1. 2010. do 31. 12. 2011. godine je iz zemalja:

- Hrvatske 457.856 t (71,64%),
- Italije 141.153 t (22,09%),
- Slovenije 21.594 t (3,38%) itd.

Najveći uvoznici u FBiH, prema procentu, su:

- Holdina d.o.o. Sarajevo 24,90%
- Hifa-Oil d.o.o. Tešanj 21,73%
- Petrol BH Oil Comp. Sarajevo 15,03%
- Energopetrol, d.d. Sarajevo 14,34%

Evidentno je da samo četiri firme participiraju u cjelokupnom uvozu sa 76%, i pored liberalizacije uvoza u BiH i brojnih kompanija koje se bave prometom nafte i naftnih derivata.

Podaci o uvozu naftnih derivata u FBiH su dio prometovanih količina naftnih derivata na području ovog entiteta. Potpuni podaci o prometovanim količinama čine zbir uvezenih količina naftnih derivata u FBiH iz drugih zemalja i derivata nabavljenih u rafineriji u Bosanskom Brodu.

Naime, od 2010. godine bilansom energetske potreba je uvedena obaveza evidentiranja podataka o nabavljenoj količini naftnih derivata iz rafinerije u Bosanskom Brodu, isključivo na osnovu podataka - dobivenih od prometnika naftnih derivata u FBiH, što je bila obaveza i u prethodnoj poslovnoj godini.

Ukupno je od I do XII 2011. nabavljeno iz rafinerije u Bosanskom Brodu ili od drugog dobavljača iz Republike Srpske 280.992 tona n/d, što je za 2,5% više u odnosu na isti period godinu ranije. U ovim

količinama najviše su zastupljeni derivati nabavljeni od Optima Grupe d.o.o. Banja Luka u iznosu od oko 97%.

tona

Vrsta derivata	Pregled nabavljenih količina naftnih derivata iz RS u 2011. godini
BMB-98	3.086
BMB-95	22.859
MG	0
Petrol.	0
Euro. diz.	145.760
Luel	61.532
Mazut	4.247
TNP	3.247
Bitum.	40.221
Dr. proiz.	40
Ukupno	280.992

Izvor - Federalno ministarstvo trgovine

Pokazatelji koji čine ukupan zbir količina naftnih derivata uvezenih u FBiH i derivata nabavljenih u rafineriji u Bosanskom Brodu pokazuju da je kompanija Hifa Oil d.o.o. Tešanj pojedinačni lider u ukupnom prometu naftnih derivata u BiH (pokazatelji prometa n/d ove kompanije za 2011. godinu prezentirani su u prethodnom broju Glasnika).



Za naftni sektor u BiH uspjeh domaće kompanije je važan, posebno ukoliko se ima u vidu da su dugo na našem tržištu prvo mjesto u ukupnom prometu zauzimali evropske kompanije.

Amela KEČO, dipl. pravnik
a.keco@kfbih.com

Lakše do posla

Riječ je o dvogodišnjem projektu koji ima cilj da nastavi sa podrškom izgradnji institucija i kapaciteta stručnog obrazovanja i obuke u BiH, te da se nadograđuje na prethodne i postojeće reformske aktivnosti u oblasti srednjeg stručnog obrazovanja

Evropska unija pruža podršku reformi srednjeg stručnog obrazovanja i obuke u BiH od 1998. godine. Pomoć je realizovana kroz nekoliko do sada provedenih projekata.

EU VET je dvogodišnji projekat koji ima cilj da nastavi sa podrškom izgradnji institucija i kapaciteta stručnog obrazovanja i obuke u BiH i da se nadograđuje na prethodne i postojeće reformske aktivnosti u oblasti srednjeg stručnog obrazovanja.

Tržište rada

Jedan od projektnih zadataka jeste izrada standarda za zanimanja u okviru porodice „Poljoprivreda i prerada hrane“ i u skladu sa tim izmjenama postojećih planova i programa za dato zanimanje. Konačna svrha cijele ove aktivnosti jeste da svršeni učenici što bolje mogu odgovoriti na zahtjeve tržišta rada i samim tim olakšati proces zapošljavanja.

Učešće predstavnika tržišta rada od ključne je važnosti za cijeli proces. Stoga su predstavnici P/GKFBiH učestvovali na seminaru koji se održao od 12. do 15. marta.

Cilj seminara bio je izrada standarda zanimanja

Poljoprivreda i prerada hrane (poljoprivredni tehničar, veterinarski i prehrambeni tehničar, te cvječar-vrtlar, farmer, mesar, voćar-vinogradar, pekar, prehrambeni prerađivač i prerađivač mlijeka).

Lise Wichmann, voditelj seminara, predstavila je aktivnosti koje su mu prethodile i istakla da je obavljeno 85 intervjuova u 62 kompanije. Intervjue je obavio 31 nastavnik srednjih stručnih škola. Njihov rezultat treba da budu revidirani standardi u ovim zanimanjima u BiH.

Predstavljen je danski model srednjeg stručnog obrazovanja, te obrazovanje u području prehrane Slovenije.

Nastavak saradnje

Učestvovali su predstavnici Odjeljenja za stručno obrazovanje, Agencije za predškolsko, osnovno i srednje obrazovanje, Ministarstva civilnih poslova BiH, nastavnici-mentori iz ranijih EU VET projekata, nastavnici iz 40 nominiranih pilot-škola, predstavnici pedagoških zavoda BiH, predstavnik Privredne komore RS, predstavnik komore Brčko Distrikta BiH i dva predstavnika iz P/GFBiH.

Aktivnosti seminara su se odvijale po grupama, prema navedenim zanimanjima. Na osnovu podataka prikupljenih intervjuima sačinjen je prijedlog revidiranih standarda po svakom od ovih zanimanja.

Lise Wichmann održala je sastanak sa predstavnicima privrednih komora, kao važnih društvenih partnera u ovoj oblasti, i zaključila da su komore važna kopča između obrazovnog sistema i privrede u oblasti reforme srednjeg stručnog obrazovanja.

Zajednički stav je da će nastavak saradnje u ovoj oblasti rezultirati pomacima u reformi obrazovanja i boljem ispunjavanju uslova na zahtjeve tržišta rada, što bi u konačnici dovelo do lakšeg procesa zapošljavanja.

M. IDRIZOVIĆ



VANJSKOTRGOVINSKA KOMORA BOSNE I HERCEGOVINE
СПОЉНОТРГОВИНСКА КОМОРА БОСНЕ И ХЕРЦЕГОВИНЕ



PRIVREDNA/GOSPODARSKA KOMORA
FEDERACIJE BOSNE I HERCEGOVINE
CHAMBER OF ECONOMY OF THE FEDERATION OF BOSNIA AND HERZEGOVINA

JAVNI POZIV

Privredna/Gospodarska komora Federacije BiH je i ove godine planirala da sa privrednim subjektima iz BiH organizira učešće na Međunarodnom općem sajmu u Prištini, u okviru dogovorenih aktivnosti nosilaca zajedničkih poslova po projektima komora u BiH. Ovo je sedmi put da Komora organizira kolektivni nastup bosanskohercegovačkih preduzeća na ovom sajmu.

Pozivamo sve zainteresirane privrednike da učestvuju u promociji privrede BiH i budu izlagači ili članovi privredne delegacije na

MEĐUNARODNOM OPĆEM SAJMU - PRIŠTINA 2012. od 06. do 09. juna 2012. godine

Rok za prijavu je 10. maj 2012.

Međunarodni sajam u Prištini organizira Privredna komora Kosova u suradnji sa Ministarstvom trgovine i industrije Kosova.

Cijena standardno uređenog štanda je 75 eura/m².

Za sve detaljnije informacije obratite se kontakt osobama: Šemsa Alimanović, telefon: 033 566 310, faks: 033 217 783, e-mail: s.alimanovic@kfbih.com i Lejla Sadiković, telefon: 033 566 311, e-mail: lsadikovic@kfbih.com

Šire mogućnosti kumulacije porijekla robe

Uprava za indirektno-neizravno oporezivanje BiH obavijestila je Komoru FBiH da je u „Službenom glasniku Bosne i Hercegovine - Međunarodni ugovori”, broj 3/11, od 28. jula prošle godine, objavljena Odluka broj 1/11 Zajedničkog odbora uspostavljenog Ugovora o slobodnoj trgovini između BiH i Republike Turske o izmjenama i dopunama Protokola 1 Ugovora o definiciji pojma „proizvodi sa porijeklom” i načinima administrativne saradnje. Stupila je na snagu 14. decembra 2011. godine.

U Službenom glasniku Evropske zajednice broj: 2012/C 63/06, od 02. 03. 2012. godine, objavljena je nova tabela u kojoj su navedene zemlje sa kojima se kumulacija porijekla može primijeniti i datumi početka primjene.

Na ovaj način proširene su mogućnosti kumulacije porijekla robe među zemljama koje su zaključile sporazume o slobodnoj trgovini i primjenjuju ista pravila porijekla. Sektor za carine izradio je tabelarne pregled: kumulacije porijekla robe iz CEFTA Strana uz učešće robe turskog porijekla, kumulacije porijekla robe iz CEFTA Strana uz učešće robe evropskog porijekla i kumulacije porijekla robe u skladu sa Protokolom 1 Ugovora o slobodnoj trgovini između BiH i R Turske.

Na osnovu odredaba člana 4. Protokola o definiciji pojma „proizvodi sa porijeklom” i načinom administrativne saradnje, koji su sastavni dio sporazuma o slobodnoj trgovini i objavljenih obavještenja, proizvodima porijeklom iz BiH će se smatrati proizvodi koji sadrže materijale porijeklom iz CEFTA Strana, Evropske zajednice i Turske.

Tabele u kojima su navedene zemlje sa kojima se kumulacija porijekla robe može primijeniti:

Mirsada MEŠANOVIĆ
m.mesanovic@kfbih.com

Član 3. Aneksa 4 Protokola o definiciji pojma „proizvodi s porijeklom” i načinima administrativne saradnje Sporazuma o izmjeni i pristupanju Centralnoevropskom sporazumu o slobodnoj trgovini - CEFTA 2006 („Službeni glasnik BiH” - Međunarodni ugovori, broj 9/07).

KUMULACIJA PORIJEKLA ROBE

TABELA 1: Kumulacija porijekla robe iz CEFTA Strana uz učešće robe turskog porijekla

CEFTA Strane	Kumulacija primijenjena sa:	BOSNA I HERCEGOVINA	
		Roba u <u>BiH</u> ima preferencijalni status	Roba zadržala <u>tursko</u> porijeklo
SRBIJA	TURSKA	DA	1. Ako je roba upućena u BiH iz Srbije, Crne Gore, Makedonije i Albanije zadržala tursko porijeklo, na takvu robu prilikom puštanja u slobodan promet primijenit će se preferencijalna stopa carine iz Ugovora o slobodnoj trgovini između BiH i Turske. 2. Roba turskog porijekla se može koristiti samo za potrebe kumulacije u BiH i kao takva izvoziti za potrebe kumulacije u Hrvatsku , a ne za puštanje u slobodan promet sa preferencijalnom stopom carine.
HRVATSKA	TURSKA	DA	
MAKEDONIJA	TURSKA	DA	
CRNA GORA	TURSKA	DA	
ALBANIJA	TURSKA	DA	
MOLDAVIJA	TURSKA	NE	
UNMIK-KOSOVO	TURSKA	NE	

TABELA 2: Kumulacija porijekla robe iz CEFTA Strana uz učešće robe evropskog porijekla

CEFTA Strane	Kumulacija primijenjena sa:	BOSNA I HERCEGOVINA		
		Roba u <u>BiH</u> ima preferencijalni status	Roba zadržala <u>evropsko</u> porijeklo	Objašnjenje
SRBIJA	EZ	DA	DA	1. Ukoliko roba zadrži evropsko porijeklo i izveze se iz Hrvatske, Srbije, Crne Gore, Makedonije i Albanije u BiH, na takvu robu se prilikom puštanja u slobodan promet primjenjuje preferencijalna stopa carine iz Privremenog sporazuma između BiH i EZ. 2. Kumulacija nije moguća sa Moldavijom i UNMIK-Kosovo.
ALBANIJA	EZ	DA	DA	
CRNA GORA	EZ	DA	DA	
MAKEDONIJA	EZ	DA	DA	
HRVATSKA	EZ	DA	DA	
MOLDAVIJA	EZ	NE	NE	
UNMIK-KOSOVO	EZ	NE	NE	

Odluka broj 1/11 Zajedničkog odbora uspostavljenog Ugovorom o slobodnoj trgovini između BiH i Republike Turske o izmjenama i dopunama Protokola 1 o definiciji pojma „proizvodi sa porijeklom“ i načinima administrativne saradnje („Službeni glasnik BiH“ - Međunarodni ugovori, broj 3/11, od 28. 07. 2011. godine).

TABELA 3: Kumulacija porijekla u okviru Ugovora o slobodnoj trgovini između BiH i R.Turske

Kumulacija primjenjena sa:		BOSNA I HERCEGOVINA		
		Roba u BiH ima preferencijalni status	Roba zadržala tursko porijeklo	
			Prilikom puštanja u slobodan promet ova roba ostvaruje preferencijalni tretman na osnovu Ugovora o slobodnoj trgovini između BiH i Turske	
			Preferencijalna stopa carine	Objašnjenje
T U R S K A	SRBIJA	DA	DA	1. Ukoliko roba zadrži tursko porijeklo i izveze se iz <i>Srbije, Crne Gore, Makedonije i Albanije</i> , u BiH, na takvu robu prilikom puštanja u slobodan promet primjenjuje se preferencijalna stopa carine iz Ugovora o slobodnoj trgovini između BiH i Turske.
	ALBANIJA	DA	DA	
	CRNA GORA	DA	DA	
	MAKEDONIJA	DA	DA	
	HRVATSKA	NE	NE	2. Ukoliko se roba uvozi u BiH iz Turske, a zadržala je porijeklo <i>Srbije, Crne Gore, Makedonije ili Albanije</i> , na takvu robu se prilikom puštanja u slobodan promet primjenjuje preferencijalna stopa carine iz sporazuma CEFTA.
	MOLDAVIJA	NE	NE	
	UNMIK-KOSOVO	NE	NE	
		2. Kumulacija nije moguća sa Hrvatskom, Moldavijom i UNMIK-Kosovo.		

Obavijest Komisije o datumu početka primjene protokola o pravilima o porijeklu za dijagonalnu kumulaciju porijekla između EU, Albanije, BiH, Hrvatske, Bivše Jugoslovenske Republike Makedonije, Crne Gore, Srbije¹ i Turske

(2012/C 63/06)

U svrhe uspostavljanja dijagonalne kumulacije porijekla između EU, Albanije, BiH, Hrvatske, Bivše Jugoslovenske Republike Makedonije, Crne Gore, Srbije i Turske, EU i zemlje na koje se to odnosi, pomoću EZ obavještavaju jedna drugu o pravilima za porijeklo koji su na snazi sa drugim zemljama.

Na osnovu obavještenja primljenog od pomenutih zemalja, u prilogu se nalazi tabela koja daje pregled protokola o pravilima porijekla za dijagonalnu kumulaciju navodeći datum od kojeg takva kumulacija postaje primjenjiva. Ova tabela zamjenjuje prethodnu (OJ C 215, 21. 07. 2011. p 27).

Podsjeća se da se kumulacija može primijeniti jedino ako su zemlje finalne proizvodnje i finalnog odredišta zaključile sporazume o slobodnoj trgovini, koje imaju jednaka pravila

porijekla, sa svim zemljama koje učestvuju u sticanju statusa porijekla, tj. sa svim zemljama iz kojih dolaze korišteni materijali. Materijali porijeklom iz zemalja koje nisu zaključile ugovor sa zemljama konačne proizvodnje i konačnog odredišta se moraju tretirati kao materijal bez porijekla.

Takođe se podsjeća da materijali porijeklom iz Turske pokriveni EU / Turska carinskom unijom mogu biti uključeni kao materijali sa porijeklom u svrhe dijagonalne kumulacije između EU i zemalja koje učestvuju u procesu stabilizacije i pridruživanja sa kojima je protokol o porijeklu na snazi.

ISO - Alpha - 2 kodovi za zemlje su navedeni u tabeli ispod:

- Albanija	AL
- BiH	BA
- Hrvatska	HR
- Bivša Jugoslovenska Republika Makedonija	MK*
- Crna Gora	ME
- Srbija	RS
- Turska	TR

Datum početka primjene protokola o pravilima o porijeklu za dijagonalnu kumulaciju porijekla između EU, Albanije, BiH, Hrvatske, Bivše Jugoslovenske Republike Makedonije, Crne Gore, Srbije i Turske

	EU	AL	BA	HR	MK	ME	RS	TR
EU		1. 1. 2007.	1. 7. 2008.	1. 6. 2011.	1. 1. 2007.	1. 1. 2008.	8. 12. 2009.	(1)
AL	1. 1. 2007.		22. 11. 2007.	22. 8. 2007.	26. 7. 2007.	26. 7. 2007.	24. 10. 2007.	1. 8. 2011.
BA	1. 7. 2008.	22. 11. 2007.		22. 11. 2007.	22. 11. 2007.	22. 11. 2007.	22. 11. 2007.	14. 12. 2011.
HR	1. 6. 2011.	22. 8. 2007.	22. 11. 2007.		22. 8. 2007.	22. 8. 2007.	24. 10. 2007.	
MK	1. 1. 2007.	26. 7. 2007.	22. 11. 2007.	22. 8. 2007.		26. 7. 2007.	24. 10. 2007.	1. 7. 2009.
ME	1. 1. 2008.	26. 7. 2007.	22. 11. 2007.	22. 8. 2007.	26. 7. 2007.		24. 10. 2007.	1. 3. 2010.
RS	8. 12. 2009.	24. 10. 2007.	22. 11. 2007.	24. 10. 2007.	24. 10. 2007.	24. 10. 2007.		1. 9. 2010.
TR	(1)	1. 8. 2011.	14. 12. 2011.		1. 7. 2009.	1. 3. 2010.	1. 9. 2010.	

(1) Za robe pokrivena sa EU - Turska carinskom unijom, datum primjene je 27. 07. 2006.

¹ Albanija, BiH, Hrvatska, Bivša Jugoslovenska Republika Makedonija, Crna Gora i Srbija su zemlje koje učestvuju u procesu stabilizacije i pridruživanja.

* ISO kod 3166. privremeni kod koji ne zaključuje unaprijed na bilo koji način definitivnu nomenklaturu za ovu zemlju, koji će biti zaključen iz pregovora koji se trenutno vode pod vođstvom UN-a.



PRIVREDNA/GOSPODARSKA KOMORA
FEDERACIJE BOSNE I HERCEGOVINE
CHAMBER OF ECONOMY OF THE FEDERATION OF BOSNIA AND HERZEGOVINA



Poziv za učešće sa projektima na Trećoj
međunarodnoj investicijskoj konferenciji

„Sarajevo Business Forum 2012“

Poštovani,

Zadovoljstvo nam je pozvati vas da učestvujete sa svojim projektima na Trećoj međunarodnoj konferenciji „Sarajevo Business Forum 2012“, koja će se održati u Sarajevu od 16. do 18. 05. 2012.godine. „Sarajevo Business Forum“ je jedinstvena prilika za Bosnu i Hercegovinu, kao i za susjedne zemlje iz regiona da predstavite svoje projekte brojnim stranim investitorima, te da kroz direktne kontakte osiguraju finansijska sredstva preko „joint venture“ ili nekog drugog vida partnerstva.

Privredna/Gospodarska komora FBiH, kao suorganizator „Sarajevo Business Forum“, poziva svoje članice da ponude svoje projekte iz oblasti: infrastrukture, energije, obrazovanja, poljoprivrede, turizma, finansija, građevinarstva, kao i drugih grana industrije.

Učešće na Forumu uvjetovano je registracijom koju možete izvršiti na web stranici „Sarajevo Business Forum“:

<http://www.sarajevobusinessforum.com/>


Za prijave projekata iz vaše oblasti možete kontaktirati direktno na telefone i e-mail kako slijedi:

ahmed.corbo@bbi.ba telefon: 033 275183 sanel.nurkanovic@bbi.ba 033 275 156

Cijeneći dosadašnju uspješnu poslovnu saradnju, očekujemo vaše aktivno učešće u nastupajućem „Sarajevo Business Forum“, s ciljem realizacije vaših projekata.

Stojimo vam na raspolaganju za sve informacije vezane za kvalitetnu prezentaciju vaših projekata na „Sarajevo Business Forum“ 2012.

S poštovanjem,


Avdo Rapa, dipl.iur
Predsjednik P/G Komore FBiH





“Eco-company” d.o.o.Sarajevo

Po zahtjevu i želji kupaca!

Razgovarala:
Amela KEČO,
dipl. pravnik
a.keco@kfbih.com

Jedan od bosanskohercegovačkih lidera u proizvodnji ekskluzivnog namještaja vrhunskog kvaliteta jeste kompanija Eco company. Najsavremenija tehnologija i visokokvalitetni materijali namještaj ove kompanije čine prepoznatljivim po specifičnom modernom dizajnu i funkcionalnosti.

Tokom desetogodišnjeg poslovanja Eco Company je izrastao u kompaniju evropskog nivoa i jedan od najuspješnijih bh. brendova.

Razgovaramo sa Suhadom Ećom, generalnim direktorom Eco Company.

Mukotrpan period stvaranja i jačanja kompanije je iza vas. Kao osnivač i prvi čovjek firme, kako danas gledate na njen nastanak.

- Moj san se nije mnogo razlikovao od sna većine naših ljudi koji žele napraviti neki dobar biznis. Ostvarenje sna nije bilo nimalo lahko. U jednoj zemlji kao što je Bosna i Hercegovina, da bi se napravio dobar posao, potrebno je mnogo veće zalaganje i trud nego što je to u zapadnim zemljama. Međutim, upornost i konstantan rad se uvijek isplate.

Kada sumiram svoje dosadašnje rezultate vidim uzlaznu liniju. Danas sam izuzetno ponosan na ovo što smo postigli. Zajedno sa mojim uposlenicima, trudim se da ovim pravcem i nastavimo.

Sudeći prema vašim dosadašnjim rezultatima, imate na što biti ponosni!

- Bez imalo skromnosti smatram da smo napravili, prije svega, zdravu i renomiranu kompaniju, u kojoj smo za kratak period postali prepoznatljiv brend i lider u proizvodnji ekskluzivnog namještaja kako u BiH tako i van granica naše zemlje.

O našem radu govore brojne nagrade, priznanja i uspjesi, prije svega naši zadovoljni kupci.

Moje je profesionalno, ali i lično zadovoljstvo što je Eco Company dobitnik brojnih priznanja i nagrada, posebno što ove godine slavimo mali jubilej - deset godina nastanka. Nagrade i vjernost kupaca su pokazatelji da smo za



Suhad Ećo

deceniju prepoznati kao kompanija koja je u BiH donijela jedan novi pristup proizvodnji namještaja i uređenju enterijera.

U osnovi proizvodnog asortimana Eco Company je proizvodnja ekskluzivnog namještaja sa posebnim modernim dizajnom. Danas smo svjedoci da u našim prodajnim salonima imamo veliku zastupljenost tzv. namještaja za narodne mase. Kažite nam ko su vaši kupci?

- Osnovne karakteristike koje nas izdvajaju od konkurencije i ono po čemu je naš namještaj

prepoznatljiv jesu estetika i dizajn, vrhunski kvalitet, maksimalna funkcionalnost i udobnost, lepeza materijala koji se koristi.

Naši kupci su profilisani ljudi koji prepoznaju i znaju cijeliti dizajn i kvalitet i upravo zbog toga kvalitetu naše ponude i usluge određuje kupac. Mi kao kolektiv nastojimo stalno pratiti i istraživati očekivanja i želje kupaca, kako bi unaprijed mogli predvidjeti, propisati i zadovoljiti njihove zahtjeve.

Stoga se naša bazna filozofija poslovanja zasniva na „custom made“ pristupu gdje se cjelokupan asortiman radi po zahtjevu i želji kupca.

Zbog toga smo u okviru kompanije razvili i Dizajn studio, koji se bavi dizajniranjem i projektovanjem namještaja i enterijera. U saradnji sa našim arhitektima i dizajnerima ponudit ćemo optimalna rješenja za opremanje svakog prostora.

Koristeći ekskluzivne i najkvalitetnije repromaterijale, sav asortiman se izrađuje prema narudžbi i zahtjevu klijenta, te je svaki proizvedeni komad unikatan.

Zahvaljujući dizajnerskom studiju, kupci mogu besplatno dobiti stručne savjete, posjetu na terenu i 3D prijedloge i prikaze objekata i prostora koje žele opremiti ili namještaja koji žele kupiti.

Jedan od najpoznatijih bh. brendova je brend Inside. Inside se neizostavno veže za ime Vaše kompanije. Kako je nastao?

- Postali smo prepoznatljiv brend jer smo otvoreni za inovacije i kreativan pristup poslu, a naziv Inside je upravo jedan od takvih projekata.

Nastajanje brenda Inside, iako na prvi pogled jednostavno, u stvari, bilo je potpuno suprotno. Ideja o brandingu nastala je prije dvije godine. Cilj je bio da kupci dobiju što jednostavnije ime koje će svojim nazivom asociirati na sve ono što radi naše preduzeće.

Riječ je o tome da Ećo Company veliku pažnju i sredstva ulaže u marketing. Stoga smo, uz naš marketing tim, savjete vrhunskih stručnjaka iz područja marketinga i naše želje da jednostavno svojim imenom budemo što bliže kupcima, napravili brend Inside koji svojim jednostavnim, a u istom trenutku specifičnim nazivom asociira kupce na unutrašnjost, toplinu doma i lijepo uređen enterijer.

Da li postojeći asortiman proizvoda planirate obogatiti novim sadržajima, odnosno šta su prioritetni planovi u predstojećem periodu?

- Kroz vlastiti dizajn studio i projektni biro izgrađen je originalni i prepoznatljiv stil. Arhitekti i dizajneri kompanije konstatno i svakodnevno posjećuju sajmove i stručna predavanja, a u kontaktu su i sa naj-

većim svjetskim dizajnerima, prate savremena dešavanja iz ove oblasti kako bi novitete primijenili na vlastitim proizvodima.

Naš dizajn studio stalno traži nove inspiracije. Svjedok tome je i posjeta sajmu u Milanu, gdje su naši arhitekti bili u potrazi za novim idejama i inspiracijama u cilju kreiranja proizvoda vlastitog dizajna.

U našem salonu stalno su prisutni novi proizvodi, modifikacije postojećih, a sve u cilju da kupcu ponudimo što raznovrsniji izbor kako namještaja tako i detalja koji ga prate.

Planovi za daljnji razvoj poslovanja su ambiciozni.

Planira se proširenje proizvodnog asortimana i uspostavljanje novih tehnologija sa ciljem daljnjeg razvijanja kvaliteta vlastitih proizvoda i otvaranja naših specijaliziranih salona u većim gradovima u BiH, kao i jačanja izvoza.

Ećo Company bilježi kontinuirani godišnji rast prihoda što je cilj i u narednom periodu. Shodno ekspanzivnom rastu kompanije, samo u maju ove godine planira se zaposliti veći broj radnika.

Dobitnik ste i brojnih priznanja ne samo onih koja se odnose na kvalitet vaših proizvoda već i mnogih drugih. Ovom prilikom spomenut ću priznanje za humano i etičko upravljanje ljudskim resursima, proizvodnjom i okolišem, Internacionalne lige humanista. Priznanje predstavlja dokaz ugleda, poštovanja i povjerenja koje kompanija uživa u sredini u kojoj djeluje i šire u poslovnom svijetu, čime na poseban način doprinosi misiji Internacionalne lige humanista u BiH. Priznanje za etičko upravljanje ljudskim resursima je u našim uslovima privređivanja rijetko. Koliko je, po Vašem mišljenju, pravilan odabir kadrova značajan za uspjeh kompanije?

- Izuzetno smo ponosni na Priznanje za etičko upravljanje ljudskim resursima, koje nam je dodijelila Internacionalna liga humanista. Svaka promjena će biti daleko lakša ako je uspostavljen dobar sistem informiranja i komuniciranja koje spriječava unošenje straha i nelagodnosti kod zaposlenika. Nažalost, danas se mnoge promjene dešavaju bez znanja i učešća zaposlenih i one se odvijaju u grču, s naglašenim jazom menadžmenta i zaposlenika. Stoga svaka reorganizacija mora biti jednostavna, kako bi zaposlenici uvidjeli logičnost promjena u poslovanju.

Naš menadžment ima moralnu odgovornost prema svim zaposlenicima i saradnicima u poslovnom procesu i dužan je ugrađivati etička, humana načela i principe u deklarirane vrijednosti preduzeća kojima upravlja.



Ekonomska kriza je prisutna u svim segmentima društva. Malo je kompanija koje poslovnu godinu završavaju sa pozitivnim poslovnim rezultatom. U protekloj 2011. godini Ečo company je ostvario zapažen rast poslovnih aktivnosti, proširili ste i proizvodne kapacitete. Postoji li recept uspješnosti?

- Ciljevi i planovi koje je usvojio menadžment omogućili su da se Ečo Company razvije u modernu, efikasnu i profitabilnu kompaniju. U 2011., kao i u proteklom periodu ove godine, u potpunosti smo ispunili i ispunjavamo planove tako da je naš namještaj prisutan i na tržištu Europske unije.

Svi naši proizvodi imaju garanciju kvalitete prema standardu ISO 9001:2008, te su rađeni u skladu sa brigom o zaštiti okoliša prema standardu ISO 14001:2004.

čaju. Lančana reakcija izazvana recesijom u zemljama ostavit će velike posljedice i u našoj branši, koje će, sigurno, rezultirati smanjenim obimom posla i smanjenjem investicija u segmentu privatnog kapitala općenito. Brojne firme su već stavile ključ u bravu. Rijetki su oni koji se uspješno bore i uspješno posluju na ovom burnom i nestabilnom tržištu.

Iz moje perspektive, smatram da država ne čini dovoljno kako bi se ova kriza, barem djelimično, ublažila, a da ne pričamo o njenom potpunom prestanku i stabilizaciji.

Za poboljšanje postojeće situacije potrebni su značajniji poticaji proizvođačima, manja opterećenja, manji nameti i veća briga o proizvodnji. Ako ne možemo biti najbolji u tehnologiji, možemo barem u proizvodnji drveta i proizvoda od drveta, naša država je 60% pokrivena šumama i tog resursa imamo u izobilju.



Uspješna saradnja odvija se sa najboljim bh. arhitektima i arhitektonskim biroima, kao i dizajnerima enterijera.

Dugogodišnja tradicija, dizajn, inovativnost, kao i individualni pristup i prilagodljivost željama klijenata su naš recept uspješnog poslovanja.

Sa stanovišta uspješnog privrednika, smatrate li da postoji mogućnost skorije ekonomske stabilizacije u našoj zemlji?

- Gotovo da ne postoji privredna grana kojoj ekonomska kriza već odavno nije zakucala na vrata. Značajnije posljedice krize na tržištu drvo-prerađivačkog sektora i te kako se osje-

Vaša kompanija je članica Privredne/Gospodarske komore FBiH. Smatrate li da su dovoljno iskorištene mogućnosti i nadležnosti Komore, posebno kada su u pitanju promovisanje i zaštita interesa domaćih kompanija?

- Mi jesmo članica P/GKFBiH i izuzetno smo zadovoljni naporima Komore u poboljšanju i zaštiti interesa domaćih kompanija. Smatram da je, pored velikog angažmana, moguće veće poboljšanje u jačanju i promociji domaćih kompanija, ali pretpostavljam da su za to povećanje potrebna i veća finansijska sredstva, veća samostalnost privredne komore, odnosno veći angažman države.

Utvrđen Prijedlog zakona o koncesijama

Ciljevi Zakona o koncesijama Federacije BiH, čiji je Prijedlog utvrdila Vlada FBiH, jesu jačanje gospodarskog razvoja Federacije, stvaranje učinkovitog pravnog okvira za promoviranje i olakšavanje provedbe i razvitak koncesijskih projekata, te unaprijeđenje transparentnosti procesa dodjeljivanja koncesija.

Koncesije mogu biti davane za gospodarsko korištenje prirodnog bogatstva, dobra u općoj uporabi ili drugog dobra, za javne radove i za javne usluge.

Zakon se odnosi na dodjelu koncesija za obavljanje gospodarskih djelatnosti i usluga, te izvođenje radova u oblastima: javnih cesta, luka, zračnih luka, željeznica, korištenja voda i javnog vodnog dobra, komunalne djelatnosti, održavanja zaštitnih vodnih objekata ili riječnih korita, hidroakumulacija, pitkih, ljekovitih, termalnih, termomineralnih i mineralnih voda, hidromelioracijskih sustava, energetskih objekata, mineralnih sirovina, podzemnih voda i geotermalne energije, građevinskog zemljišta, lovišta, ribolovnih voda, cjevovoda i terminala za skladištenje i transport tekućina i plinova, poljoprivrednog zemljišta, kulturnih dobara, djelatnosti upravljanja otpadom, neškodljivog uklanjanja organskog otpada, skijaških centara i žičara, riječnog prijevoza, sporta i turizma.

Poljoprivredna zemljišta

Vlada FBiH je razmatrala i usvojila Strategiju upravljanja poljoprivrednim zemljištem na području Federacije BiH, kao i Akcioni plan za njeno sprovođenje. Strategija obuhvata mjere, aktivnosti i vrijeme izvršenja i institucije za njeno provođenje.

Upravljanje zemljištem se zasniva na zakonskoj regulativi uz analizu Evropske strategije zaštite tla s osvrtom na odnos poljoprivrede sa Okvirnom direktivom o vodama.

Prijedlog zakona o izmjenama i dopunama Zakona o Poreznoj upravi Federacije BiH

Zastupnički dom Parlamenta Federacije BiH usvojio je Prijedlog zakona o izmjenama i dopunama Zakona o Poreznoj upravi Federacije BiH, kojeg je utvrdila Federalna vlada. Cilj ovog zakonskog prijedloga jeste povećanje efikasnosti u naplati poreznih obaveza od poreznih obveznika koji na svaki način opstruiraju rad Porezne uprave.

Prihvaćen Nacrt zakona o radu

Zastupnički dom Federalnog parlamenta prihvatio je Nacrt zakona o radu kojeg je utvrdila Vlada Federacije BiH. Neke od novina u ovom tekstu zakona su povećanje minimalnog trajanja godišnjeg odmora sa

18 na 20 radnih dana, kao i mogućnost da pravo na porođajno odsustvo, nakon isteka minimuma od 42 dana, koristi otac djeteta.

Odobren Nacrt zakona o upošljavanju stranaca

Predstavnički dom Parlamenta FBiH utvrdio je Nacrt novog federalnog zakona o upošljavanju stranaca.

Osim definicija stranca, zaposlenja, poslodavca, obrtnika, kao i ravnopravnosti stranaca s državljanima u Federaciji BiH u pogledu prava, obaveza i odgovornosti, propisana je decidirano i zabrana njihove diskriminacije u odnosu na državljane BiH.

Prijedlog zakona o izmjenama i dopunama Zakona o ličnoj karti državljana BiH

Zastupnički dom i Dom naroda Parlamenta BiH usvojio je Prijedlog zakona o izmjenama i dopunama Zakona o ličnoj karti državljana BiH, čija svrha je unaprijeđenje zaštite ličnih podataka, poboljšanje sistema sigurnosti u vezi s izdavanjem lične karte i primjene propisa u vezi s elektronskim potpisom.

Usvojen Prijedlog zakona o sistemu državne pomoći

Prijedlogom zakona o sistemu državne pomoći, koji je usvojen po hitnom postupku, uređuju se opšti uslovi za dodjelu, kontrolu dodjele i korištenja, odobravanje i povrat nezakonito dodijeljene državne pomoći, popis državne pomoći i izvještavanje o državnoj pomoći, s ciljem uspostavljanja i osiguranja konkurentnih tržišnih uslova, kao i izvršavanja preuzetih obaveza po zaključenim međunarodnim ugovorima koji sadrže odredbe o državnoj pomoći.

Pravilnik o upravljanju ambalažom i ambalažnim otpadom

Ovim Pravilnikom uvodi se integrirani sustav upravljanja ambalažnim otpadom, koji obuhvata sve vrste ambalažnog otpada bez obzira na vrstu materijala, njegov sadržaj i porijeklo.

Novi pravilnik o ambalaži i ambalažnom otpadu stupio je na snagu početkom ove godine, a omogućit će uspostavu i izgradnju održivog sustava reciklaže ambalažnog otpada i smanjenje otpada koji se odlaže na deponijama.

Prijedlog zakona o dopuni Zakona o eksproprijaciji

Dom naroda prihvatio je i Prijedlog zakona o dopuni Zakona o eksproprijaciji. Dopuna se, zbog namjeravane eksproprijacije, odnosi na obeštećenje u visi-

ni građevinske vrijednosti određenom broju bespravnih graditelja stambenih objekata na trasi koridora 5c, te na trasama drugih planiranih autocesta u Federaciji, radi brže gradnje ključne saobraćajne infrastrukture na tim dionicama.

Prijedlog zakona o izmjenama i dopunama Zakona o Poreznoj upravi

Delegati Doma naroda su odobrili Prijedlog zakona o izmjenama i dopunama Zakona o Poreznoj upravi FBiH. Izmjene imaju za cilj veću efikasnost u naplati poreznih obaveza od neurednih obveznika koji na svaki način opstruiraju rad Porezne uprave.

Uređenja i unaprijeđenja zaštite pojedinačnih prava u oblasti intelektualnog vlasništva

Vijeće ministara BiH, u procesu usklađivanja oblasti intelektualnog vlasništva s evropskom legislativom, donijelo je više odluka radi daljnjeg normativnog uređenja i unaprijeđenja zaštite pojedinačnih prava u ovoj oblasti. Vijeće ministara BiH donijelo je: Odluku o provođenju carinskih mjera za zaštitu prava nositelja žiga, Odluku o provođenju carinskih mjera za zaštitu prava nositelja industrijskog dizajna, Odluku o provođenju carinskih mjera za zaštitu prava nositelja autorskog i srodnih prava, Odluku o provođenju carinskih mjera za zaštitu prava nositelja imena podrijetla ili geografske oznake i Odluku o provođenju carinskih mjera za zaštitu prava nositelja patenta. Na ovaj će se način omogućiti da procedure koje provodi Uprava za neizravno oporezivanje BiH ne budu kočnica protoku robe na eksternoj granici Evropske unije, nakon što Hrvatska naredne godine postane punopravna članica EU.

Zakon o bilju

Izmjene i dopune Zakona o sjemenu i sadnom materijalu, koje su utvrđene i u formi Prijedloga upućene u parlamentarnu proceduru rezultat su potrebe usklađivanja sa Zakonom o izmjenama i dopunama Zakona o federalnim ministarstvima i drugim tijelima federalne uprave kojima su osnovani na federalnom nivou Zavod za poljoprivredu Sarajevo i Agromeditranski zavod Mostar. Pored vršenja stručnih i drugih poslova iz nadležnosti Federacije, ovi zavodi ovlašteni su i za certificiranje sjemena i sadnog materijala poljoprivrednog bilja.

Porez na dohodak

Nakon što je uočeno kako se pojedine odredbe Zakona o porezu na dohodak pogrešno tumače i primjenjuju, jer nisu dovoljno jasno definirane, Vlada FBiH je, u formi Prijedloga, utvrdila i Parlamentu FBiH

uputila po hitnoj proceduri njegove izmjene i dopune.

Jedna od izmjena je i brisanje odredaba koje reguliraju oporezivanje prihoda fizičkih osoba ostvarenih sudjelovanjem u igrama na sreću i u nagradnim igrama, budući da će ovo pitanje biti regulirano Prijedlogom novog zakona o igrama na sreću.

Nacrt zakona o volontiranju

Predstavnički dom Parlamenta Federacije Bosne i Hercegovine prihvatio je Nacrt zakona o volontiranju.

Dugoročni volonterski rad priznavat će se kao radno iskustvo, jedna je od odrednica ovog teksta. To je bitno, posebno za mlade kod zapošljavanja, jer se konkurnim uvjetima, osim odgovarajuće diplome, najčešće zahtijeva radno iskustvo. Nacrt je upućen u šezdesetodnevnu javnu raspravu.

Strategija razvoja namjenske industrije u Federaciji BiH

Predstavnički dom Federalnog parlamenta odobrio je desetogodišnju strategiju razvoja namjenske industrije u Federaciji koju je predložila Vlada. Strategija za razvoj namjenske industrije urađena je s ciljem da se pomogne u stvaranju održivog razvoja ovog industrijskog sektora, baziranog na proizvodnji za inostrano tržište, uz uredno snabdijevanje oružanih snaga naše zemlje prema iskazanim potrebama. Strategija se zasniva na maksimalnom korištenju postojećih kadrovskih i materijalnih resursa uz jače korištenje domaćih repromaterijala i primjenu savremenih tehnologija, te poštivanje obaveza u očuvanju životne sredine i zaštite okoliša.

Prijedlog zakona o autocesti na koridoru 5c

Prijedlog ovog zakona predstavlja kompilaciju već reguliranih pitanja otvorenih u postupku realizacije projekta od istražnih radova i projektiranja, preko rješavanja imovinsko-pravnih pitanja i obezbjeđenja potrebnih suglasnosti i dozvola, načina obezbjeđivanja investicionih sredstava do konačne izgradnje i puštanja u funkciju cijele autoceste u koridoru 5c ili dijelova tog složenog projekta.

Predloženim rješenjima su precizirana nedovoljno regulisana područja, pojednostavljene standardne procedure, izmijenjen redoslijed aktivnosti i korigovane nadležnosti i rokovi dati u općim zakonima, a sve u cilju intenziviranja radova na autocesti koridora 5c. Ako su određena rješenja i u eventualnom sukobu sa općim pravilima, pravila iz ovog Zakona imaju prednost u primjeni.

Pripremila: Mira IDRIZOVIĆ
m.idrizovic@kfbih.com

Indeks potrošačkih cijena

Prema podacima Agencije za statistiku BiH, u februaru 2012. godine na mjesečnom nivou zabilježena je inflacija od 0,7%.

Cijene proizvoda i usluga koje se koriste za ličnu potrošnju u Bosni i Hercegovini mjerene indeksom potrošačkih cijena, u februaru 2012. godine u odnosu na januar, u prosjeku, su porasle za 0,7%.

U odjeljku hrana i bezalkoholna pića zabilježen je rast cijena za 1,3%, u odjeljku prijevoza za 1,2%, stanovanje, voda, plin i električna energija za 0,3%.

Rast cijena u odjeljku Hrana i bezalkoholna pića je uzrokovan rastom cijena voća i povrća za 10,5%, odnosno 5,2%. Rast cijena u odjeljku prijevoz uzrokovan je rastom cijena goriva za 2,2%.

Posmatrano po odjeljcima prema namjeni potrošnje (COICOP), u februaru u odnosu na januar, u prosjeku, je zabilježen pad cijena samo u odjeljku odjeće i obuće za 0,2%.

Godišnja inflacija u februaru 2,4%

Cijene u februaru 2012. u odnosu na februar 2011. godine, u prosjeku, su više za 2,4%.

Prosječni rast cijena je zabilježen u odjeljcima alkoholna pića i duhan za 9,3%, prijevoz za 6,8%, stanovanje, voda, električna energija, plin i drugi energenti za 2,9%, Restorani i hoteli za 2,4%, hrana i bezalkoholna pića za 2,3%, namještaj, kućanski uređaji i redovno održavanje kuće za 2%, komunikacije za 1,7%, rekreacije i kulture i ostalih dobara i usluga za 0,3%, te Obrazovanja za 0,2%.

Snižanja cijena, u prosjeku, su zabilježena u odjeljcima odjeće i obuće za 6,5%, te zdravstva za 0,4%. Prema mjerenjima Eurostata (Statističkog ureda Evropske unije), procijenjena godišnja inflacija u februaru 2012. godine u području eura (13 evropskih zemalja Evropske monetarne unije) ostala je stabilna na stopi od 2,7%.

Indeks proizvođačkih cijena industrije

U februaru 2012. godine zabilježen je rast nivoa proizvođačkih cijena industrijskih proizvoda na domaćem tržištu za 0,4%.

U poređenju sa januarom zabilježen je rast nivoa proizvođačkih cijena industrijskih proizvoda na domaćem tržištu za ukupnu industriju za 0,4%.

Posmatramo li glavne industrijske grupe (GIG-ove), zabilježen je rast cijena Intermedijarnih proizvoda za 0,6%, netrajnih proizvoda za široku upotrebu za 0,4%, te energije za 0,3%. Cijene glavnih industrijskih grupa trajnih proizvoda za široku upotrebu i kapitalnih proizvoda u istom periodu nisu zabilježile promjene.

Posmatramo li područja i oblasti KD-a, u istom periodu zabilježen je rast proizvođačkih cijena u oblasti vađenja ruda i kamena za 1,3%, te prerađivačke industrije za 0,5%. Cijene u oblasti proizvodnje i snabdijevanja električnom energijom, plinom, parom i toplom vodom su u istom periodu ostale nepromijenjene.

U februaru 2012. u poređenju sa prethodnim mjesecom, značajniji rast proizvođačkih cijena je zabilježen samo u vađenju ostalih ruda i kamena za 2,8%, Reciklaži za 1,7%, te proizvodnji baznih metala za 1,4%.

U istom periodu značajniji pad cijena je zabilježen samo u proizvodnji električnih mašina i aparata d.n.k. za 1,9%, te proizvodnji prehrambenih proizvoda i pića za 1,4%.

Proizvođačke cijene industrijskih proizvoda u februaru 2012. godine u poređenju sa februarom 2011. godine više su za 1,2%. Rast je zabilježen u industrijskim grupama energije za 2,9%, te netrajnih proizvoda za široku upotrebu za 2,3%. Cijene intermedijarnih proizvoda su u istom periodu opale za 2,3%, trajnih proizvoda za široku upotrebu za 0,3%, te kapitalnih proizvoda za 0,1%.

U istom periodu zabilježen je rast proizvođačkih cijena u oblastima vađenja ruda i kamena za 5,5%, proizvodnji i snabdijevanju električnom energijom, plinom i toplom vodom zabilježen za 1,9% dok je u prerađivačkoj industriji zabilježen pad od 0,1%.

Indeks obima industrijske proizvodnje

U februaru 2012. bazni indeks ukupne industrijske proizvodnje u Bosni i Hercegovini (indeks prema prosječnoj mjesečnoj proizvodnji iz bazne godine 2005.) je manji od indeksa u januaru 2012. za 11,9 indeksnih poena. Indeks prema prosječnoj mjesečnoj proizvodnji iz 2011. iznosi 87,2. Stopa promjene industrijske proizvodnje u odnosu na februar 2011. godine je negativna i iznosi -12,8%. Stopa promjene kumulativne proizvodnje prema istom periodu 2011. iznosi -9,9%.

U području vađenje ruda i kamena stopa promjene proizvodnje u odnosu na februar 2011. godine iznosi -10,9%. Bazni indeks je manji od indeksa u januaru 2012. za 21,9 indeksnih poena. Indeks prema 2011. iznosi 80,1.

U području prerađivačka industrija stopa promjene proizvodnje u odnosu na februar 2011. godine iznosi -16,5%. Bazni indeks je manji od indeksa u januaru 2012. za 10,6 indeksnih poena.

Indeks prema 2011. iznosi 79,2.

U području proizvodnja i snabdijevanje električnom energijom, gasom i vodom stopa promjene proizvodnje u odnosu na februar 2011. godine iznosi -3,9%. Bazni indeks je manji od indeksa u januaru 2012. za 9,5 indeksnih poena. Indeks prema 2011. iznosi 111,4.

Indeks potrošačkih cijena

Ukupan indeks potrošačkih cijena u februaru/veljači 2012. godine viši je za 0,6% u odnosu na prethodni mjesec, podaci su Federalnog zavoda za statistiku.

Posmatrano po odjeljcima COICOP klasifikacije (Classification of Individual Consumption by Purpose), rast cijena registrovan je u odjeljku hrana i bezalkoholna pića za 1,3%, prijevoz za 1,1%, stanovanje, električna energija plin i drugi energenti za 0,3%, ostala dobra i usluge za 0,2% i alkoholna pića i duhan za 0,1%. U odjeljcima Odjeća i obuća i zdravstvo cijene su niže za 0,1%.

U ostalim odjeljcima cijene se nisu mijenjale u ovom mjesecu. Ukupan indeks potrošačkih cijena u februaru viši je za 2,5% u odnosu na isti mjesec prethodne godine i za 1,4% u odnosu na decembar 2011. godine.

Za dva mjeseca ove u odnosu na isti period prethodne godine ukupan indeks potrošačkih cijena je viši za 2,4%, a u posljednjih dvanaest u odnosu na prethodnih dvanaest mjeseci viši je za 3,5%.

Ukupan indeks potrošačkih cijena u februaru viši je za 2,1% u odnosu na prosjek 2011. godine, a u odnosu na prosjek 2010. godine viši je za 5,7%.

Indeksi industrijske proizvodnje

Industrijska proizvodnja u Federaciji BiH u februaru u odnosu na prosječnu mjesečnu proizvodnju iz 2011. godine manja je za 17,8%, u odnosu na proizvodnju iz istog mjeseca prošle manja je za 12,2%, dok je u odnosu na januar ove godine manja za 9,9%.

Ukupna industrijska proizvodnja za januar/februar 2012. u odnosu na isti period 2011. godine manja je za 9,6%, u području vađenje ruda i kamena manja je za 0,4%, u području prerađivačke industrije manja je za 6,3%, i u području proizvodnje i snabdijevanja električnom energijom, gasom i vodom manja je za 22,1%.

Prema glavnim industrijskim grupacijama industrijskih proizvoda januar/februar 2012. u odnosu na isti period 2011. godine, proizvodnja bilježi povećanje trajnih proizvoda za široku potrošnju za 15,1%, dok je zabilježeno smanjenje energije za 18,5%, intermedijarnih proizvoda, osim energije za 7,0%, kapitalnih proizvoda za 16,5% i netrajnih proizvoda za široku potrošnju za 9,4%.

Robna razmjena sa inostranstvom

Federacija BiH je u februaru 2012. ostvarila izvoz u ukupnoj vrijednosti 349.180 hiljada KM, što je za 38.639 hiljada KM ili 10% manje u odnosu na januar ove, odnosno za 89.635 hiljada KM ili 20,4% manje u odnosu na februar prethodne godine.

U istom mjesecu ostvaren je uvoz u vrijednosti 657.397 hiljada KM, što je za 6.023 hiljade KM ili 0,9%

više u odnosu na januar 2012., odnosno za 92.983 hiljade KM ili 12,4% manje u odnosu na februar prethodne godine.

Učešće Federacije BiH u ukupnom izvozu Bosne i Hercegovine za februar je 66,8%, a u ukupnom uvozu 69,9%.

U istom mjesecu pokrivenost uvoza izvozom u Federaciji BiH je 53,1% i manja je za 6,4% u odnosu na januar kada je bila 59,5%.

Trgovinski deficit u februaru bio 308.217 hiljada KM

Trgovinski deficit Federacije BiH za februar iznosi 308.217 hiljada KM.

Prema KD-u, u februaru najveća vrijednost izvoza 320.802 hiljade KM ostvarena je u području prerađivačka industrija, što iznosi 91,9% ukupnog izvoza. Najveća vrijednost u uvozu 568.284 hiljade KM ostvarena je u području prerađivačka industrija, što iznosi 86,4% ukupnog uvoza.

Prema SMTK, u februaru, najveće učešće u izvozu ostvareno je u sektoru industrijski proizvodi, razvrstani, uglavnom, po sirovini sa vrijednošću 109.046 hiljada KM, što je 31,2% ukupnog izvoza.

U istom mjesecu najveće učešće u uvozu ostvareno je u sektoru mašine i transportna sredstva sa vrijednošću 132.936 hiljade KM, što je 20,2% ukupnog uvoza.

U februaru najviše se izvozilo u: Njemačku 79.899 hiljada KM ili 22,9% ukupnog izvoza; Hrvatsku 45.550 hiljada KM ili 13% i Italiju 36.923 hiljade KM ili 10,6% ukupnog izvoza.

Izvoz u sve ostale zemlje iznosi 186.808 hiljada KM ili 53,5% ukupnog izvoza.

U istom mjesecu najviše se uvozilo iz: Hrvatske 121.225 hiljada KM ili 18,4% ukupnog uvoza, Njemačke 92.940 hiljada KM ili 14,1% i Italije 56.742 hiljade KM ili 8,6% ukupnog uvoza.

Uvoz iz ostalih zemalja iznosi 386.490 hiljada KM ili 58,8% ukupnog uvoza.

Proizvodnja i prodaja drvnih sortimenata

Ukupna proizvodnja šumskih sortimenata u februaru 2012. godine u odnosu na isti mjesec lani manja je za 117.000 m³ ili 53,2%.

Proizvodnja sortimenata od četinara manja je za 67.000 m³ (42,7%), dok je proizvodnja sortimenata od lišćara manja za 51.000 m³ (61,9%).

Ukupna prodaja šumskih sortimenata u februaru 2012. godine u odnosu na isti mjesec 2011. je manja za 90.000 m³ (52,9%).

Prodaja sortimenata od četinara manja je za 52.000 m³ (41,6%) dok je prodaja sortimenata od lišćara manja za 38.000 m³ (62,8 %).

Izveštaj o napretku BiH u 2011. godini

Od marta 2002. godine Komisija je redovno izvještavala Vijeće i Parlament o napretku koji su postigle države regiona zapadnog Balkana. Izveštaj, uglavnom, slijedi strukturu iz prethodnih godina, ukratko opisuje odnose između BiH i Unije, analizira situaciju u BiH u pogledu političkih i ekonomskih kriterija za članstvo i daje pregled sposobnosti BiH da provodi evropske standarde, odnosno da postepeno usklađuje svoje zakonodavstvo i politike sa *acquis-em*, u skladu sa Privremenim sporazumom o stabilizaciji i pridruživanju i prioritetima evropskog partnerstva

(nastavak iz brojeva 111 - 112)

Transportna politika

Bilježi se napredak u oblasti *transevropskih transportnih mreža*. Bosna i Hercegovina primjenjuje i prati višegodišnji plan 2011 - 2015. transportne opservatorije za jugoistočnu Evropu. Aktivno učestvuje u provedbi Memoranduma o razumijevanju o razvoju glavne regionalne transportne mreže jugoistočne Evrope.

Nastavljeni su radovi na dodatnim dionicama Panevropskog koridora Vc. Remont saobraćajnih traka i signalizacije na dionici Ploče - Bradina je završen. Završena je preliminarna studija izvodljivosti o željezničkoj vezi sa Crnom Gorom.

Bilježi se dobar napredak *kada je riječ o putnom transportu*. Republika Srpska usvojila je Zakon o bezbjednosti saobraćaja na putevima Republike Srpske. Usvojeno je provedbeno zakonodavstvo neophodno za uvođenje sistema digitalnih tahografa, osigurana je oprema i sistem je operativan. Bosna i Hercegovina počela je sa izdavanjem karneta ATA. Nastavljeno je održavanje i gradnja puteva. Ipak, i dalje je potrebno usvojiti zakon o prevozu opasnih roba.

Bilježi se određeni napredak kada je u pitanju *željeznički transport*. Regulatorni odbor željeznica Bosne i Hercegovine je u okviru svojih nadležnosti izdao licence i izradio propise o željeznicama koji su usklađeni sa *acquis-em*. Unaprijeđeni su uslovi vezani za vozni park. Željeznice Federacije objavile su svoje mrežne izjave, dok Željeznice Republike Srpske to nisu učinile. Iako su entitetska željeznička preduzeća pretvorena u vertikalno integrisana, oba su u teškoj finansijskoj situaciji. Njihova upravljačka infrastruktura i dalje je u potpunosti odvojena od željezničkog preduzeća. I dalje je potrebno preuzeti *acquis* o obavezama javnih usluga, te uspostaviti tijelo za dodjelu ovlaštenja za obavljanje ovih usluga.

Nije postignut napredak u oblasti *pomorskeg transporta*. Bosna i Hercegovina nije potpisnica većine konvencija Međunarodne pomorske organizacije kao što je Međunarodna konvencija o sigurnosti života na moru (SOLAS), uključujući Međunarodni kodeks za sigurnost brodova i lučkih objekata ili Međunarodnu konvenciju o spriječavanju zagađenja mora sa brodova (MARPOL).

Dobar, ali neujednačen napredak zabilježen je u oblasti *unutrašnjih plovnih puteva*. Započeo je proces deminiranja i osposobljavanja plovnog puta rijekom Savom. Predsjedništvo Bosne i Hercegovine usvojilo je Sporazum između Vlade Republike Srbije i Vijeća ministara Bosne i Hercegovine o plovidbi unutrašnjim plovnim putevima, što je preduslov za ponovno uspostavljanje plovidbe rijekom Savom. Ipak, još uvijek je potrebno uvesti riječni informacioni sistem. Nije postignut napredak na području *kombinovanog transporta*.

Dobar napredak postignut je u oblasti *vazdušnog transporta*. Bosna i Hercegovina realizuje prvu fazu Sporazuma o zajedničkom evropskom vazdušnom prostoru. Preuzimanje zakonodavstva o Jedinostvenom evropskom nebu gotovo je završeno. Imenovan je direktor tijela za pružanje usluga u vazdušnoj plovidbi. Ipak, kako bi se osigurala potpuna usklađenost sa preuzetim *acquis-em*, potrebno je prilagoditi Zakon o vazduhoplovstvu.

Sveukupno gledano, Bosna i Hercegovina bilježi napredak u oblasti transevropskih transportnih mreža, cestovnog, željezničkog i vazdušnog saobraćaja, kao i u oblasti unutrašnjih plovnih puteva, ali zaostaje u pogledu pomorskog transporta. Potrebni su dalji naponi na usklađivanju zakonodavstva sa *acquis-em*. Još uvijek je potrebno izraditi strategije za transportnu infrastrukturu i intenzivirati unapređenje transportne infrastrukture.

(nastavak u sljedećem broju)

Pripriemila: M. IDRIZOVIĆ



ANKETNI UPITNIK ZA 25. IZBOR „100 NAJVEĆIH U BiH“ Velikih, srednjih i malih preduzeća

1. Naziv tvrtke/firme: _____

2. Adresa: _____

3. Telefon, faks, e-mail: _____

4. Osnovna djelatnost: _____

5. Broj uposlenih: _____

a) Ukupan iznos uplaćenih prihoda za PIO/MIO u 2011.: _____

b) Ukupan iznos uplaćenih direktnih i indirektnih poreza; _____

6. Tip vlasništva: a) državno; b) privatno; c) mješovito (većinski vlasnik _____%)

7. Generalni menadžer: _____

8. U skladu sa Zakonom o računovodstvu i reviziji, svrstali ste se u:

a) velika b) srednja c) mala preduzeća

9. Ukupan prihod u 2011. godini u KM: _____

10. Izvoz u 2011. godini u KM: _____

11. Netto dobit u 2011. godini u KM: _____

12. Investicije u 2011. godini u KM: _____

a) ukupan iznos investicija u 2011. stranih: _____ i domaćih _____

b) u nove tehnologije; _____

c) za zaštitu okoliša i energetske efikasnosti; _____

d) u edukaciju kadrova; _____

13. Ukupan iznos ulaganja u humanitarne projekte lokalne zajednice: _____

Potpis:

MP

Ispunjen i ovjeren anketni listić pošaljite do 21. 05. 2012. na 033/461-023 ili
privrednastampa@epn.ba Hvala na učešću.

U toku je 25. izbor 100 najvećih kompanija u BiH prema rezultatima iz 2011. godine!

POSLOVNE 
za uspješne i one koji to žele biti **NOVINE**
godina sa vama

100[®]

NAJVEĆIH U BOSNI I HERCEGOVINI

25. izbor velikih, srednjih i malih kompanija u BiH
prema rezultatima poslovanja u 2011. godini

Partneri projekta



VANJSKOTRGOVINSKA KOMORA BOSNE I HERCEGOVINE
СПОЉНОТРГОВИНСКА КОМОРА БОСНЕ И ХЕРЦЕГОВИНЕ



ASOCIJACIJA POSLODAVACA BOSNE I HERCEGOVINE
ASSOCIATION OF EMPLOYERS OF BOSNIA AND HERZEGOVINA



PRIVREDNA/GOSPODARSKA
KOMORA FEDERACIJE
BOSNE I HERCEGOVINE



PRIVREDNA KOMORA
BRČKO DISTRIKTA BiH
ПРИВРЕДНА КОМОРА
БРЧКО ДИСТРИКТА БиХ



Pokrovitelji projekta



FOREIGN INVESTMENT PROMOTION AGENCY
OF BOSNIA AND HERZEGOVINA



BOSNA I HERCEGOVINA
FEDERACIJA BOSNE I HERCEGOVINE
MINISTARSTVO RAZVOJA,
PODUZETNIŠTVA I OBRTA

БОСНА И ХЕРЦЕГОВИНА
ФЕДЕРАЦИЈА БОСНЕ И ХЕРЦЕГОВИНЕ
МИНИСТАРСТВО РАЗВОЈА,
ПОДУЗЕТНИШТВА И ОБРТА



VLADA ŽUPANIJE POSAVSKE
BOSNA I HERCEGOVINA
MINISTARSTVO GOSPODARSTVA
I PROSTORNOG UREĐENJA



MINISTARSTVO ZA PRIVREDU
ZENIČKO - DOBOJSKI KANTON



MINISTARSTVO PRIVREDE/GOSPODARSTVA
HERCEGOVAČKO-NERETVANSKOG KANTONA/ŽUPANIJE



MINISTARSTVO PRIVREDE
KANTON SARAJEVO



Grad
Sarajevo

Posebности ovog projekta u odnosu na druge srodne manifestacije jesu:

TRADICIJA, KREDIBILITET I

OBJEKTIVNOST Rangiranje se vrši na osnovu jasno definisanih kriterija - po ukupnom prihodu, neto dobiti, izvozu i investicijama.

TRANSPARENTNOST

Rang-liste sa svim podacima objavljuju se u specijalnom izdanju Poslovnih novina.

DOSTUPNOST

Daje jednake šanse svim privrednim subjektima da učestvuju u izboru, a rangiranje na liste je besplatno.

Učestvujte i Vi u ovom značajnom projektu za privredu BiH!

Anketni listić možete preuzeti na www.privrednastampa.biz

ili dobiti na zahtjev u redakciji Poslovnih novina na 033/461-009, privrednastampa@epn.ba
ili marketingu 033/234-712 darija@djikic.com